

ओं नमः परमात्मने, श्री महागणपतये नमः,
श्री गुरुभ्यो नमः, ह॒रिः ओं

कृष्ण यजुर्वेदीय तैत्तिरीय संहिता पद पाठः
(वाक्य सहित)

पञ्चमकाण्डे षष्ठः प्रश्नः

Notes:

1. Please refer to the book “TS Kandam 1” and “TS 1.1 pada paadam with Vaakyam” for notes and conventions used in this Compilation.
2. Please download our vedic compilations from our web site www.vedavms.in

Table of Contents

5 कृष्ण यजुर्वेदीय तैत्तिरीय संहितायां पद पाठे

पञ्चमं काण्डं 3

5.6 पञ्चमकाण्डे षष्ठः प्रश्नः – उपानुवाक्याभिधानं 3

ओं नमः परमात्मने, श्री महागणपतये नमः,

श्री गुरुभ्यो नमः , हरिः ओं

5 कृष्ण यजुर्वेदीय तैत्तिरीय संहितायां पद पाठे पञ्चमं काण्डं

5.6 पञ्चमकाण्डे षष्ठः प्रश्नः – उपानुवाक्याभिधानं

TS 5.6.1.1

हिरण्यवर्णाः शुचयः पावका यासु जातः कश्यपो यास्विन्द्रः ।
अग्निं या गर्भं दधिरे विरूपास्ता न आपः शः स्योना भवन्तु ॥
यासां राजा वरुणो याति मध्ये सत्यानृते अवपश्यन् जनानां ।
मधुश्रुतः शुचयो याः पावकास्ता न आपः शः स्योना भवन्तु ॥
यासां देवा दिवि कृण्वन्ति भक्षं या अन्तरिक्षे बहुधा भवन्ति ।
याः पृथिवीं पयसोन्दन्ति – [] 1

TS 5.6.1.1 - Padam

हिर॑ण्यव॒र्णा इति॑ हिर॑ण्य – वर्णाः॑ । शुच॑यः । पा॒व॒काः । या॒सु ।
जा॒तः । क॒श्यपः॑ । या॒सु । इन्द्रः॑ ॥ अ॒ग्निम् । याः । गर्भ॑म् । द॒धिरे ।
वि॒रूपा इति॑ वि – रूपाः॑ । ताः । नः । आपः॑ । शम् । स्यो॒नाः ।
भव॑न्तु ॥ या॒साम् । राजा॑ । वरु॑णः । याति॑ । म॒द्ध्ये॑ । स॒त्यानृ॑ते इति॑
सत्य॑ – अ॒नृते । अ॒वप॑श्यन्नित्य॑व – प॒श्यन् । ज॒नाना॑म् ॥ म॒धुश्रु॑त
इति॑ म॒धु – श्रु॑तः । शुच॑यः । याः । पा॒व॒काः । ताः । नः । आपः॑ ।
शम् । स्यो॒नाः । भव॑न्तु ॥ या॒साम् । दे॒वाः । दि॒वि । कृ॒ण्वन्ति॑ ।
भक्ष॑म् । याः । अ॒न्तरि॑क्षे । बहु॑धेति॑ बहु – धा । भव॑न्ति ॥ याः ।
पृ॒थि॒वीम् । प॒यसा॑ । उ॒न्दन्ति॑ । 1 (50)

TS 5.6.1.2

शु॒क्रास्ता॑ न आपः॑ श॒ः स्यो॒ना भव॑न्तु ॥
शि॒वेन॑ मा चक्षु॑षा प॒श्यताऽऽपः॑ शि॒वया॑ त॒नुवो॑प स्पृ॒शत॑ त्वचं॑ मे ।
सर्वा॑ँ अ॒ग्नीँ र॑प्सुषदो॑ हुवे वो म॒यि वर्चो॑ ब॒लमो॑जो नि ध॑त्त ॥
यद॑दः सं प्र॒यती॑रहा वन॑दताह॒ते ।

तस्मा॑दा न॒द्यो॑ नाम॒ स्थ॒ ता वो॒ नामा॑नि सिन्धवः ॥

यत् प्रे॑षिता वरु॒णेन॑ ताः शी॒भम्॑ सम॒वल्गा॑त । 2

TS 5.6.1.2 - Padam

शु॒क्राः । ताः । नः । आपः॑ । शम् । स्यो॒नाः । भव॑न्तु ॥ शिवे॑न ।

मा । चक्षु॑षा । पश्य॑त । आपः॑ । शिव॑या । तनु॑वा । उपेति॑ ।

स्पृ॒शत॑ । त्वच॑म् । मे ॥ सर्वा॑न् । अग्नी॑न् । अ॒प्सुष॑द

इत्य॑प्सु – सदः॑ । हु॒वे । वः । मयि॑ । वर्चः॑ । बल॑म् । ओजः॑ ।

नीति॑ । धत्त॑ ॥ यत् । अदः॑ । संप्र॑यतीरिति सं – प्र॒यतीः॑ । अहौ॑ ।

अन॑दत । ह॒ते ॥ तस्मा॑त् । एति॑ । न॒द्यः । नाम॒ स्थ॒ ता । वः ।

नामा॑नि । सिन्ध॑वः ॥ यत् । प्रे॑षिता इति प्र – इ॒षिताः॑ । वरु॒णेन॑ ।

ताः । शी॒भम् । सम॒वल्गा॑तेति सं – अव॑ल्गात ॥ 2 (50)

TS 5.6.1.3

तदा॑प्नो-दिन्द्रो॑ वो य॒ती-स्तस्मा॑-दापो॒ अनु॑ स्थन ॥

अ॒प॒काम॑ स्यन्द॑माना अवी॑वरत वो हि॒कं ।

इन्द्रो॑ वः शक्ति॑भि दे॒वी-स्तस्मा॑द्-वा॒र्णामि॑ वो हि॒तं ॥

एको॑ दे॒वो अ॒प्यति॑ष्ठ॒थ् स्य॑न्द॒माना॑ यथा व॒शं ।

उ॒दा॒नि॒षु-र्म॒हीरि॑ति॒ तस्मा॑-दु॒दक॑-मु॒च्यते॑ ॥

आपो॑ भ॒द्रा घृ॒तमि॑दाप॒ आसु॑र॒ग्नी-षो॑मौ बिभ्र॒त्याप॑ इत् ताः ।

ती॒व्रो र॒सो मधु॑पृ॒चा - [] 3

TS 5.6.1.3 - Padam

तत् । आ॒प्नो॑त् । इ॒न्द्रः । वः । य॒तीः । तस्मा॑त् । आपः॑ । अ॒न्वि॒ति॑ ।

स्थ॒न ॥ अ॒प॒का॒ममि॑त्यप - का॒मम् । स्य॑न्द॒मानाः । अ॒वी॒वर॑त । वः ।

हि॒कम् ॥ इ॒न्द्रः । वः । श॒क्ति॒भि॒रिति॑ श॒क्ति-भिः॑ । दे॒वीः । तस्मा॑त् ।

वाः । ना॒म । वः । हि॒तम् ॥ ए॒कः । दे॒वः । अ॒पी॒ति॑ । अ॒ति॒ष्ठ॒त् ।

स्य॑न्द॒मानाः । यथा॑व॒शमि॑ति॒ यथा - व॒शम् ॥ उ॒दि॒ति॑ । आ॒नि॒षुः ।

म॒हीः । इ॒ति॑ । तस्मा॑त् । उ॒दक॑म् । उ॒च्य॑ते ॥ आपः॑ । भ॒द्राः ।

घृ॒तम् । इत् । आपः॑ । आ॒सुः । अ॒ग्नी॒षो॒मावि॑त्य॒ग्नी - सो॑मौ ।

बिभ्र॑ति । आपः॑ । इत् । ताः ॥ ती॒व्रः । र॒सः ।

मधु॑पृ॒चामि॑ति॒ मधु॑-पृ॒चाम् । 3 (50)

TS 5.6.1.4

–म॒रंग॒म आ मा॑ प्रा॒णेन॑ सह॒ वर्च॑सा गन् ॥
आदि॒त् प॒श्याम्यु॑त वा शृ॒णोम्या॑ मा॒ घोषो॑ गच्छति॒ वाङ् न॑ आ॒सां ।
मन्ये॑ भेजा॒नो अ॒मृत॑स्य॒ तर्हि॑ हि॒र॒ण्यव॑र्णा अ॒तृपं॑ य॒दा वः॑ ॥
आपो॑ हि॒ ष्ठा म॑यो भुव॒स्ता न ऊ॒र्जे द॑धातन ।
महे॑ र॒णाय॑ चक्ष॒से ॥
यो वः॑ शि॒वत॑मो र॒सस्त॑स्य॒ भाज॑यते॒ह नः॑ ।
उ॒शती॑रिव॒ मातरः॑ () ॥
तस्मा॑ अ॒रं ग॑मा॒म वो य॒स्य क्ष॑याय॒ जिन्व॑थ ।
आपो॑ ज॒नय॑था च नः ॥
दि॒वि श्र॑य स्वान्तरि॒क्षे य॑तस्व पृ॒थि॒व्या सं भ॑व ब्र॒ह्मव॑र्च–स॒मसि॑
ब्र॒ह्मव॑र्च॒साय॑ त्वा ॥ 4

TS 5.6.1.4 - Padam

अ॒रङ्ग॒म इ॒त्य॒रं – ग॒मः । ए॒ति । मा॒ । प्रा॒णेने॑ति॒ प्र – अ॒नेन॑ । स॒ह ।
व॒र्च॒सा । ग॒न् ॥ आ॒त् । इ॒त् । प॒श्या॒मि । उ॒त । वा॒ । शृ॒णो॒मि ।

ए॒ति । मा॒ । घो॒षः । ग॒च्छ॒ति । वाक् । नः । आ॒साम् ॥ म॒न्ये॑ ।
भे॒जा॒नः । अ॒मृत॑स्य । तर्हि॑ । हि॒र॒ण्य॒वर्णा॑ इति हि॒र॒ण्य॑ – वर्णाः ।
अ॒तृ॒पम् । य॒दा । वः ॥ आ॒पः । हि॒ । स्थ॒ ।
म॒यो॒भुव॑ इति म॒यः – भुवः॑ । ताः । नः । ऊ॒र्जे॑ । द॒धा॒त॒न ॥ म॒हे ।
र॒णाय॑ । चक्ष॑से ॥ यः । वः । शि॒व॒त॒म॒ इति॑ शि॒व – त॒मः । र॒सः ।
त॒स्य॑ । भा॒ज॒य॒त॒ । इ॒ह । नः ॥ उ॒श॒तीः । इ॒व । मा॒तरः॑ () ॥ त॒स्मै॑ ।
अ॒रम् । ग॒मा॒म॒ । वः । य॒स्य॑ । क्ष॒या॒य॒ । जि॒न्व॒थ ॥ आ॒पः । ज॒न॒य॒थ॒ ।
च । नः ॥ दि॒वि । श्र॒य॒स्व॒ । अ॒न्त॒रि॒क्षे॑ । य॒त॒स्व॒ । पृ॒थि॒व्या॒ ।
स॒मि॒ति॒ । भ॒व॒ । ब्र॒ह्म॒व॒र्च॒स॒मि॒ति॒ ब्र॒ह्म – व॒र्च॒स॒म् । अ॒सि॒ ।
ब्र॒ह्म॒व॒र्च॒सा॒ये॒ति॒ ब्र॒ह्म – व॒र्च॒सा॒य॒ । त्वा ॥ 4 (72) (उ॒द॒न्ति॑ –
स॒म॒व॒ल्गा॒त – म॒धु॒पृ॒चां॑ – मा॒त॒रो – द्वा॒वि॒ंश॒ति॒श्च॑} (A1)

TS 5.6.2.1

अ॒पां॑ ग॒र॒हान्॑ गृ॒ह्णा॒त्ये॒त॒द्वा॒व॒ । रा॒ज॒सू॒यं॑ य॒दे॒ते॒ ग॒र॒हाः॑ स॒वो॑ ऽग्नि॒र्व॒रु॒ण॒स॒वो॑
रा॒ज॒सू॒य॑ – म॒ग्नि॒स॒व॑ – श्रि॒त्य॒स्ता॒भ्या॑ – मे॒व॒ सू॒य॒ते॒ऽथो॑ उ॒भा॒वे॒व॒ लो॒का॒व॒भि॒
ज॒य॒ति॒ यश्च॑ रा॒ज॒सू॒ये॒ने॒जा॒न॒स्य॑ यश्चा॒ऽग्नि॒चि॒त॒ आ॒पो॑ भ॒व॒न्त्या॒पो॑ वा

अग्ने॑र्भा॒तृ॒व्या॑ यद॒पो॑ ऽग्ने॑रध॒स्तादु॒प द॒धाति॑ भ्रा॒तृ॒व्याभि॑भू॒त्यै
भव॑त्या॒त्मना॑ परा॒ऽस्य॑ भ्रा॒तृ॒व्यो भव॑त्य॒मृतं॑ – [] 5

TS 5.6.2.1 - Padam

अ॒पाम् । ग्र॒हान् । गृ॒ह्णाति॑ । ए॒तत् । वाव । रा॒जसू॒यमि॑ति
रा॒ज – सू॒यम् । यत् । ए॒ते । ग्र॒हाः । स॒वः । अ॒ग्निः । व॒रुण॑स॒व इति॑
व॒रुण – स॒वः । रा॒जसू॒यमि॑ति रा॒ज – सू॒यम् । अ॒ग्निस॒व
इ॒त्यग्नि॑ – स॒वः । चि॒त्यः । ता॒भ्याम् । ए॒व । सू॒यते॑ । अथो॒ इति॑ ।
उ॒भौ । ए॒व । लो॒कौ । अ॒भीति॑ । ज॒यति॑ । यः । च । रा॒जसू॒येने॑ति
रा॒ज – सू॒येन॑ । ई॒जान॑स्य । यः । च । अ॒ग्नि॒चित॑ इ॒त्यग्नि॑-चि॒तः ।
आ॒पः । भ॒वन्ति॑ । आ॒पः । वै । अ॒ग्नेः । भ्रा॒तृ॒व्याः । यत् । अ॒पः ।
अ॒ग्नेः । अ॒धस्ता॑त् । उ॒प॒दधा॑तीत्यु॒प – द॒धाति॑ । भ्रा॒तृ॒व्याभि॑भू॒त्या
इति॑ भ्रा॒तृ॒व्य – अ॒भिभू॑त्यै । भ॒वति॑ । आ॒त्मना॑ । प॒रेति॑ । अ॒स्य ।
भ्रा॒तृ॒व्यः । भ॒वति॑ । अ॒मृत॑म् । 5 (50)

TS 5.6.2.2

ॐ॒वा आप॑स्तस्मा॑-द॒द्भिर॑वतान्त॑-म॒भि षि॑ञ्चन्ति॒ नाऽऽ*॒र्तिमा॑च्छति॒
सर्व॑मायु॒रेति॒ यस्यै॑ता उप॒धीय॑न्ते॒ य उ॑ चैना॒ एवं॑ वे॒दान्नं॑ वा आपः॑
प॒शव॑ आपोऽन्नं॑ प॒शवोऽन्ना॑दः प॒शुमान्॑ भवति॒ यस्यै॑ता उप॒धीय॑न्ते॒
य उ॑ चैना॒ एवं॑ वे॒द द्वाद॑श भवन्ति॒ द्वाद॑श मा॒साः सँव॑त्सरः॒
सँव॑त्सरेणै॒वास्मा॑- [] 6

TS 5.6.2.2 - Padam

वै । आपः । तस्मात् । अ॒द्भिरि॑त्यत्-भिः । अ॒वतान्त॑मित्यव-तान्तम् ।
अ॒भीति॑ । सि॒ञ्चन्ति॒ । न । आ॒र्तिम् । एति॑ । ऋ॒च्छति॒ । सर्व॑म् ।
आयुः । एति॑ । यस्य॑ । ए॒ताः । उप॒धीय॑न्त इत्युप - धीयन्ते॑ । यः ।
उ । च । ए॒नाः । ए॒वम् । वे॒द । अ॒न्नम् । वै । आपः । प॒शवः ।
आपः । अ॒न्नम् । प॒शवः । अ॒न्नाद॑ इत्यन्न - अ॒दः । प॒शुमा॑निति॒
प॒शु - मा॑न् । भवति॑ । यस्य॑ । ए॒ताः । उप॒धीय॑न्त इत्युप-धीयन्ते॑ ।
यः । उ । च । ए॒नाः । ए॒वम् । वे॒द । द्वाद॑श । भवन्ति॑ । द्वाद॑श ।

मा॒साः । सँ॒व॒थ्स॒र इति॑ सं – व॒थ्स॒रः ।

सँ॒व॒थ्स॒रेणेति॑ सं – व॒थ्स॒रेण॑ । ए॒व । अ॒स्मै । 6 (50)

TS 5.6.2.3

अ॒न्न॒म॒व॒ रु॒न्धे॑ पा॒त्राणि॑ भ॒वन्ति॑ पा॒त्रे वा अ॒न्न॒म॒द्य॒ते स॒यो॒न्ये॒वा॒न्न॒म॒व॒
रु॒न्ध आ द्वा॒द॒शात् पु॒रु॒षाद॒न्न-म॒त्यथो॑ पा॒त्रा॒न्न छि॒द्य॒ते य॒स्यै॒ता
उ॒प॒धी॒यन्ते॑ य उ चै॒ना ए॒वं वै॒द कुं॒भाश्च॑ कुं॒भीश्च॑ मि॒थु॒नानि॑ भ॒वन्ति॑
मि॒थु॒नस्य॑ प्र॒जा॒त्यै प्र प्र॒जया॑ प॒शुभि॑-मि॒थु॒नै-जा॑य॒ते य॒स्यै॒ता
उ॒प॒धी॒यन्ते॑ य उ- [] 7

TS 5.6.2.3 - Padam

अ॒न्न॒म् । अ॒वेति॑ । रु॒न्धे॑ । पा॒त्राणि॑ । भ॒वन्ति॑ । पा॒त्रे॑ । वै । अ॒न्न॒म् ।
अ॒द्य॒ते । स॒यो॒नीति॑ स – यो॒नि । ए॒व । अ॒न्न॒म् । अ॒वेति॑ । रु॒न्धे॑ ।
ए॒ति । द्वा॒द॒शात् । पु॒रु॒षात् । अ॒न्न॒म् । अ॒त्ति॑ । अ॒थो इति॑ । पा॒त्रा॒त् ।
न । छि॒द्य॒ते । य॒स्य । ए॒ताः । उ॒प॒धी॒यन्त इत्यु॑प-धी॒यन्ते॑ । यः । उ ।
च । ए॒नाः । ए॒वम् । वे॒द । कुं॒भाः । च । कुं॒भीः । च । मि॒थु॒नानि॑ ।
भ॒वन्ति॑ । मि॒थु॒नस्य॑ । प्र॒जा॒त्या इति॑ प्र – जा॒त्यै । प्रेति॑ ।

प्र॒जये॑ति॒ प्र – जया॑ । प॒शुभि॑रिति॒ प॒शु – भिः॑ । मि॒थुनैः॑ । जा॒यते॑ ।
यस्य॑ । ए॒ताः । उ॒प॒धी॒यन्त॑ इत्युप – धी॒यन्ते॑ । यः । उ । 7 (50)

TS 5.6.2.4

चै॒ना ए॒वं वै॑द शु॒ग्वा अ॒ग्निः सो॑ऽद॒ध्वर्यु॑ य॒जमा॑नं प्र॒जाः
शु॒चाऽर्प॑यति॒ यद॒प उ॒प॒दधा॑ति शु॒चमे॒वास्य॑ श॒मय॑ति
नाऽऽ*ति॒माच्छ॑त्यद॒ध्वर्यु॑र्न य॒जमा॑नः श॒म्यन्ति॑ प्र॒जा यत्रै॒ता उ॒प॒धी॒यन्ते॑
ऽपां॑ वा॒ ए॒तानि॑ हृद॒यानि॑ यदे॒ता आ॒पो यदे॒ता अ॒प उ॒प॒दधा॑ति
दि॒व्याभि॑रे॒वैनाः॑ सꣳ सृ॒जति॑ वर्॒षुकः॑ प॒र्जन्यो॑ – [] 8

TS 5.6.2.4 - Padam

च । ए॒नाः । ए॒वम् । वे॒द । शु॒क् । वै । अ॒ग्निः । सः । अ॒ध्वर्यु॑म् ।
य॒जमा॑नम् । प्र॒जा इति॑ प्र – जाः । शु॒चा । अ॒र्पय॑ति । यत् । अ॒पः ।
उ॒प॒दधा॑तीत्युप – दधाति । शु॒चम् । ए॒व । अ॒स्य । श॒मय॑ति । न ।
आ॒र्तिम् । ए॒ति । ऋ॒च्छति॑ । अ॒ध्वर्युः॑ । न । य॒जमा॑नः । श॒म्यन्ति॑ ।
प्र॒जा इति॑ प्र – जाः । यत्र । ए॒ताः । उ॒प॒धी॒यन्त॑ इत्युप – धी॒यन्ते॑ ।
अ॒पाम् । वै । ए॒तानि॑ । हृद॒यानि॑ । यत् । ए॒ताः । आ॒पः । यत् ।

ए॒ताः । अ॒पः । उ॒प॒द॒धा॒ती॒त्यु॒प – द॒धा॒ति । दि॒व्या॒भिः । ए॒व । ए॒नाः ।
स॒मि॒ति । सृ॒ज॒ति । वर्॒षु॒कः । पर्ज॑न्यः । 8 (50)

TS 5.6.2.5

भव॑ति यो वा ए॒तासा॑मा॒यत॑नं क्लृ॒प्तिं वै॑दाऽऽ*य॑त॒नवान् भव॑ति
कल्प॑ते ऽस्मा अनु॑सी॒तमु॒प द॒धात्ये॑तद्वा आ॒सामा॑य॒तन॑मेषा क्लृ॒प्तिर्य
ए॒वं वै॑दाऽऽ*य॑त॒नवान् भव॑ति कल्प॑तेऽस्मै द्वंद्व॑म॒न्या उप॑ द॒धाति
चत॑स्रो म॒द्ध्ये धृ॒त्या अन्नं॑ वा इष्ट॑का ए॒तत् खलु॑ वै सा॒क्षादन्नं॑
य॑देष चरु॒र्यदे॑तं च॒रुमु॒प द॒धाति सा॒क्षा – [] 9

TS 5.6.2.5 - Padam

भव॑ति । यः । वै । ए॒तासा॑म् । आ॒यत॑न॒मित्या॑ – य॑त॒नम् । क्लृ॒प्तिम् ।
वेद॑ । आ॒यत॑न॒वानित्या॑य॒तन – वान् । भव॑ति । कल्प॑ते । अ॒स्मै ।
अनु॑सी॒तमित्य॑नु – सी॒तम् । उपे॑ति । द॒धाति । ए॒तत् । वै । आ॒साम् ।
आ॒यत॑न॒मित्या॑ – य॑त॒नम् । ए॒षा । क्लृ॒प्तिः । यः । ए॒वम् । वेद॑ ।
आ॒यत॑न॒वानित्या॑य॒तन – वान् । भव॑ति । कल्प॑ते । अ॒स्मै । द्वंद्व॑मि॒ति
द्वं – द्वम् । अ॒न्याः । उपे॑ति । द॒धाति । चत॑स्रः । म॒द्ध्ये॑ । धृ॒त्यै॑ ।

अ॒न्नम् । वै । इ॒ष्टकाः । ए॒तत् । ख॒लु । वै । सा॒क्षादि॑ति स-अ॒क्षात् ।

अ॒न्नम् । यत् । ए॒षः । च॒रुः । यत् । ए॒तम् । च॒रुम् ।

उ॒प॒द॒धा॒तीत्यु॑प – द॒धा॒ति । सा॒क्षादि॑ति स – अ॒क्षात् । 9 (50)

TS 5.6.2.6

दे॒वास्मा॑ अ॒न्नम॑व रु॒न्धे म॑द्ध्यत उप॑ दधाति म॑द्ध्यत ए॒वास्मा॑ अ॒न्नं
द॒धा॒ति तस्मा॑न् म॑द्ध्यतोऽन्नम॑द्यते बा॒र्ह॒स्प॒त्यो भ॑वति ब्र॒ह्म वै दे॒वानां॑
बृ॒ह॒स्प॒ति-ब्र॑ह्म॒णैवा॑स्मा अ॒न्नम॑व रु॒न्धे ब्र॑ह्मवर्च॑सम॑सि
ब्र॑ह्मवर्च॑साय त्वे॒त्याह॑ तेज॒स्वी ब्र॑ह्मवर्च॑सी भ॑वति य॒स्यैष॑ उ॒प॒धी॒यते॑
य उ॑ चैनमे॒वं वे॑द ॥ 10

TS 5.6.2.6 - Padam

ए॒व । अ॒स्मै । अ॒न्नम् । अ॒वे॒ति । रु॒न्धे । म॑द्ध्यतः । उ॒पे॒ति ।
द॒धा॒ति । म॑द्ध्यतः । ए॒व । अ॒स्मै । अ॒न्नम् । द॒धा॒ति । तस्मा॑त् ।
म॑द्ध्यतः । अ॒न्नम् । अ॒द्य॒ते । बा॒र्ह॒स्प॒त्यः । भ॑वति । ब्र॒ह्म । वै ।
दे॒वाना॑म् । बृ॒ह॒स्प॒तिः । ब्र॑ह्म॒णा । ए॒व । अ॒स्मै । अ॒न्नम् । अ॒वे॒ति ।

रुन्धे । ब्रह्मवर्चसमिति ब्रह्म – वर्चसम् । असि ।

ब्रह्मवर्चसायेति ब्रह्म – वर्चसाय । त्वा । इति । आह । तेजस्वी ।

ब्रह्मवर्चसीति ब्रह्म – वर्चसी । भवति । यस्य । एषः । उपधीयत

इत्युप – धीयते ॥ यः । उ । च । एनम् । एवम् । वेद ॥ 10 (47)

(अमृत – मस्मै – जायते यस्यैता – उपधीयन्ते य उ – पर्जन्य –

उपदधाति साक्षात् – सप्तचत्वारिंशच्च) (A2)

TS 5.6.3.1

भूतेष्टका उप दधात्यत्रात्र वै मृत्युर्जायते यत्रयत्रैव मृत्युर्जायते

तत एवैनमव यजते तस्मादग्निचिथ् सर्वमायुरेति सर्वे ह्यस्य

मृत्यवो ऽवैष्टास्तस्मा-दग्निचिन्ना-भिचरितवै प्रत्यगेन-मभिचारः

स्तृणुते सूयते वा एष योऽग्निं चिनुते देवसुवामेतानि हवींषि

भवन्त्येतावन्तो वै देवानां सवास्त एवा- [] 11

TS 5.6.3.1 - Padam

भूतेष्टका इति भूत – इष्टकाः । उपेति । दधाति । अत्रात्रेत्यत्र-अत्र ।

वै । मृत्युः । जायते । यत्रयत्रेति यत्र-यत्र । एव । मृत्युः । जायते ।

ततः॑ । ए॒व । ए॒नम् । अ॒वेति॑ । य॒ज॒ते । तस्मा॑त् ।
 अ॒ग्नि॒चि॒दित्य॑ग्नि – चि॒त् । सर्व॑म् । आ॒युः । ए॒ति । सर्वे॑ । हि ।
 अ॒स्य । मृ॒त्यवः॑ । अ॒वै॒ष्टा इत्य॑व – इ॒ष्टाः । तस्मा॑त् ।
 अ॒ग्नि॒चि॒दित्य॑ग्नि – चि॒त् । न । अ॒भि॒च॒रि॒त॒वा इत्य॑भि-च॒रि॒त॒वै ।
 प्र॒त्यक् । ए॒नम् । अ॒भि॒चा॒र इत्य॑भि – चा॒रः । स्तृ॒णु॒ते । सू॒यते॑ । वै ।
 ए॒षः । यः । अ॒ग्निम् । चि॒नु॒ते । दे॒व॒सु॒वा॒मि॒ति दे॒व – सु॒वाम् ।
 ए॒तानि॑ । ह॒वी॒षि । भ॒व॒न्ति । ए॒ता॒व॒न्तः । वै । दे॒वाना॑म् । स॒वाः ।
 ते । ए॒व । 11 (50)

TS 5.6.3.2

–स्मै॑ स॒वान् प्र य॑च्छन्ति त ए॒नं सु॒वन्ते स॒र्वो॑ऽग्निर्व॒रुण॑स॒वो
 रा॒ज॒सूयं॑ ब्र॒ह्म॒स॒वश्चित्यो॑ दे॒वस्य॑ त्वा स॒वितुः॑ प्र॒स॒व इत्या॑ह
 स॒वि॒तृ॒प्र॒सू॒त ए॒वैनं॑ ब्र॒ह्म॒णा दे॒वता॑भि॒रभि॑ षिञ्च॒त्यन्न॑-स्यान्नस्याभि
 षिञ्च॒त्यन्न॑-स्यान्नस्या-व॒रु॒द्ध्यै पु॒रस्ता॑त् प्र॒त्यञ्च॑म॒भि षिञ्च॑ति
 पु॒रस्ता॑द्धि प्र॒ती॒ची-न॒म॒न्नम॑द्यते शी॒र्षतो॑ऽभि षिञ्च॑ति शी॒र्षतो॑
 ह्यन्नम॑द्यत आ मु॒खाद॑न्वव॒स्राव॑यति – [] 12

TS 5.6.3.2 - Padam

अ॒स्मै । स॒वान् । प्रेति॑ । य॒च्छन्ति॑ । ते । ए॒नम् । सु॒वन्ते॑ । स॒वः ।
अ॒ग्निः । व॒रुण॑स॒व इति॑ व॒रुण॑ – स॒वः । रा॒जसू॑यमि॒ति
रा॒ज – सू॑यम् । ब्र॒ह्म॑स॒व इति॑ ब्र॒ह्म॑ – स॒वः । चि॒त्यः । दे॒वस्य॑ । त्वा ।
स॒वि॒तुः । प्र॒स॒व इति॑ प्र – स॒वे । इति॑ । आ॒ह । स॒वि॒तृप्र॑सू॒त
इति॑ स॒वि॒तृ – प्र॑सू॒तः । ए॒व । ए॒नम् । ब्र॒ह्म॑णा । दे॒वता॑भिः । अ॒भीति॑ ।
सि॒ञ्च॒ति । अ॒न्नस्या॑न्न॒स्येत्य॑न्न॒स्य – अ॒न्नस्य॑ । अ॒भीति॑ । सि॒ञ्च॒ति ।
अ॒न्नस्या॑न्न॒स्येत्य॑न्न॒स्य – अ॒न्नस्य॑ । अ॒वरु॑द्ध्य॒ इत्य॑व – रु॒द्ध्यै ।
पु॒रस्ता॑त् । प्र॒त्यञ्च॑म् । अ॒भीति॑ । सि॒ञ्च॒ति । पु॒रस्ता॑त् । हि ।
प्र॒तीची॑नम् । अ॒न्नम् । अ॒द्यते॑ । शी॒र्ष॒तः । अ॒भीति॑ । सि॒ञ्च॒ति ।
शी॒र्ष॒तः । हि । अ॒न्नम् । अ॒द्यते॑ । एति॑ । मु॒खात् ।
अ॒न्वव॑स्राव॒यतीत्य॑नु – अ॒वस्रा॑वयति । 12 (50)

TS 5.6.3.3

मुख॑त ए॒वास्मा॑ अ॒न्नाद्यं॑ द॒धात्य॑ग्ने॒स्त्वा सा॒म्राज्ये॑नाभि॒
षि॒ञ्चामी॑त्याहैष वा अ॒ग्नेः स॒वस्ते॒नैवैन॑मभि॒ षि॒ञ्चति॑ बृ॒हस्प॑ते॒स्त्वा
सा॒म्राज्ये॑नाभि॒षि॒ञ्चामी॑त्याह ब्र॒ह्म वै दे॒वानां॑ बृ॒हस्प॑तिर्ब्र॒ह्मणै॒वैन॑मभि॒
षि॒ञ्चती॑न्द्र॒स्य त्वा सा॒म्राज्ये॑नाभि॒ षि॒ञ्चा-मी॑त्याहेन्द्रि॒यमे॒वास्मि॑-
न्नु॒परि॑ष्ठाद् द॒धात्ये॑ त- [] 13

TS 5.6.3.3 - Padam

मुख॑तः । ए॒व । अ॒स्मै । अ॒न्नाद्य॑मित्य॒न्न-अ॒द्यम् । द॒धाति॑ । अ॒ग्नेः ।
त्वा । सा॒म्राज्ये॑नेति सां - रा॒ज्येन॑ । अ॒भीति॑ । सि॒ञ्चामि॑ । इति॑ ।
आ॒ह । ए॒षः । वै । अ॒ग्नेः । स॒वः । तेन॑ । ए॒व । ए॒नम् । अ॒भीति॑ ।
सि॒ञ्चति॑ । बृ॒हस्प॑तेः । त्वा । सा॒म्राज्ये॑नेति सां-रा॒ज्येन॑ । अ॒भीति॑ ।
सि॒ञ्चामि॑ । इति॑ । आ॒ह । ब्र॒ह्म । वै । दे॒वाना॑म् । बृ॒हस्प॑तिः । ब्र॒ह्मणा॑ ।
ए॒व । ए॒नम् । अ॒भीति॑ । सि॒ञ्चति॑ । इन्द्र॒स्य । त्वा । सा॒म्राज्ये॑नेति
सां - रा॒ज्येन॑ । अ॒भीति॑ । सि॒ञ्चामि॑ । इति॑ । आ॒ह । इन्द्रि॒यम् । ए॒व ।
अ॒स्मिन् । उ॒परि॑ष्ठात् । द॒धाति॑ । ए॒तत् । 13 (50)

TS 5.6.3.4

– द्वै॑ रा॒ज॒सू॒यस्य॑ रू॒पं य॑ ए॒वं वि॒द्वान॒ग्निं चि॑नु॒त उ॒भावे॒व लो॒काव॒भि
ज॒यति॑ यश्च॒ रा॒ज॒सू॒येने॒जान॑स्य॒ यश्चा॒ग्नि॒चित॒ इन्द्र॑स्य॒ सुषु॒वाण॑स्य॒
द॒श॒धेन्द्रि॑यं वी॒र्यं॑ प॒राऽप॑तत् तद्दे॒वाः सौ॒त्राम॑ण्या॒ सम॑भरन्थ् सू॒यते॑
वा ए॒ष योऽग्निं॑ चि॒नुते॑ऽग्निं चि॒त्वा सौ॒त्राम॑ण्या॒ यजे॑तेन्द्रि॒यमे॒व
वी॒र्यं सं॑भृत्याऽऽत्मन् ध॒त्ते ॥ 14

TS 5.6.3.4 - Padam

वै । रा॒ज॒सू॒यस्येति॑ रा॒ज – सू॒यस्य॑ । रू॒पम् । यः । ए॒वम् । वि॒द्वान् ।
अ॒ग्निम् । चि॒नुते॑ । उ॒भौ । ए॒व । लो॒कौ । अ॒भीति॑ । ज॒यति॑ । यः ।
च । रा॒ज॒सू॒येनेति॑ रा॒ज – सू॒येन॑ । ई॒जान॑स्य॒ यः । च । अ॒ग्नि॒चित॒
इत्य॑ग्नि – चि॒तः । इन्द्र॑स्य॒ सुषु॒वाण॑स्य॒ द॒श॒धेति॑ द॒श – धा ।
इन्द्रि॑यम् । वी॒र्यम्॑ । प॒रेति॑ । अ॒प॒तत् । तत् । दे॒वाः । सौ॒त्राम॑ण्या ।
समि॑ति । अ॒भर॑न् । सू॒यते॑ । वै । ए॒षः । यः । अ॒ग्निम् । चि॒नुते॑ ।
अ॒ग्निम् । चि॒त्वा । सौ॒त्राम॑ण्या । य॒जेत॑ । इन्द्रि॑यम् । ए॒व । वी॒र्यम्॑ ।
सं॑भृत्येति॑ सं – भृ॒त्य । आ॒त्मन् । ध॒त्ते ॥ 14 (48)

(त ए॒वा – न्व॑व॒स्राव॑यत्ये – त – द॒ष्टाच॑त्वारि॒ंशच्च॑) (A3)

TS 5.6.4.1

स॒जूर॑ब्दोऽया॒वभिः॑ स॒जूरु॑षा अरु॒णीभिः॑ स॒जूः सूर्य॑ ए॒त॒शेन॑
स॒जोषा॑व॒श्विना॒ द॒सो॑भिः स॒जूर॑ग्निर्वै॒श्वान॑र इ॒डाभि॑र्घृ॒तेन॑ स्वाहा
सँव॑त्सरो वा अ॒ब्दो मा॒सा अया॑वा उषा अरु॒णी सूर्य॑ ए॒त॒श इ॒मे
अ॒श्विना॑ सँव॑त्सरोऽग्निर्वै॒श्वान॑रः प॒शव॑ इ॒डा प॒शवो॑ घृ॒तं
सँव॑त्सरं प॒शवो॑ऽनु प्र जा॒यन्ते॑ सँव॑त्सरेणै॒वास्मै॑ प॒शून्
प्र॒ज॒न॒य॒ति द॑र्भस्त॒म्बे जु॑होति॒ य– [] 15

TS 5.6.4.1 - Padam

स॒जूर॑रिति स – जूः । अ॒ब्दः । अया॑वभि॒रित्यया॑व – भिः । स॒जूर॑रिति
स – जूः । उषाः । अरु॒णीभिः॑ । स॒जूर॑रिति स – जूः । सूर्यः ।
ए॒त॒शेन॑ । स॒जोषा॑विति स – जोषौ । अ॒श्विना॑ । द॒सो॑भिरिति
द॒सः – भिः । स॒जूर॑रिति स–जूः । अ॒ग्निः । वै॒श्वान॑रः । इ॒डाभिः॑ ।
घृ॒तेन॑ । स्वाहा॑ । सँव॑त्सर इति सं–वत्सरः । वै । अ॒ब्दः । मा॒साः ।
अया॑वाः । उषाः । अरु॒णी । सूर्यः॑ । ए॒त॒शः । इ॒मे इति॑ । अ॒श्विना॑ ।

सँव॑थ्स॒र इति॑ सं – व॒थ्स॒रः । अ॒ग्निः । वै॒श्वान॒रः । प॒शवः॑ । इडा॑ ॥
प॒शवः॑ । घृ॒तम् । सँव॑थ्स॒रमि॑ति सं – व॒थ्स॒रम् । प॒शवः॑ । अनु॑ ।
प्रेति॑ । जा॒यन्ते॑ । सँव॑थ्स॒रेणे॑ति सं – व॒थ्स॒रेण॑ । ए॒व । अ॒स्मै ।
प॒शून् । प्रेति॑ । ज॒नय॑ति । द॒र्भस्त॑ंब इति॑ द॒र्भ – स्त॑ंबे । जु॒होति॑ ।
यत् । 15 (50)

TS 5.6.4.2

– द्वा अ॒स्या अ॒मृतं॑ यद्–वी॒र्यं॑ तद्–द॒र्भास्त॑स्मिन् जु॒होति॑ प्रै॒व जा॑यते
ऽन्ना॒दो भ॑वति॒ यस्यै॒वं जु॒ह्वत्ये॒ता वै दे॒वता॑ अ॒ग्नेः पु॒रस्ता॑द्भा॒गास्ता॑
ए॒व प्री॑णा॒त्यथो॒ चक्षु॑रे॒वाग्नेः॑ पु॒रस्ता॑त् प्र॒ति द॒धात्य॑न॒न्धो भ॑वति॒ य
ए॒वं वे॒दाऽऽ*पो॒ वा इ॒दम॑ग्रे॒ सल॑िल॒मासी॑त् स प्र॒जाप॑तिः पु॒ष्कर॑पर्णे
वा॒तो भू॑तोऽले॒लाय॑त् सः – [] 16

TS 5.6.4.2 - Padam

वै । अ॒स्याः । अ॒मृत॑म् । यत् । वी॒र्य॑म् । तत् । द॒र्भाः । त॒स्मिन् ।
जु॒होति॑ । प्रेति॑ । ए॒व । जा॒यते॑ । अ॒न्नाद॑ इत्य॒न्न – अ॒दः । भ॑वति॒ ।
य॒स्य । ए॒वम् । जु॒ह्वति॑ । ए॒ताः । वै । दे॒वताः॑ । अ॒ग्नेः ।

पुरस्ताद्भागा इति पुरस्तात् – भागाः । ताः । एव । प्रीणाति ।
अथो इति । चक्षुः । एव । अग्नेः । पुरस्तात् । प्रतीति । दधाति ।
अनन्धः । भवति । यः । एवम् । वेद । आपः । वै । इदम् । अग्रे ।
सलिलम् । आसीत् । सः । प्रजापतिरिति प्रजा – पतिः । पुष्करपर्ण
इति पुष्कर – पर्णे । वातः । भूतः । अलेलायत् । सः । 16 (50)

TS 5.6.4.3

प्रतिष्ठां नाऽविन्दत स एतदपां कुलायमपश्यत् तस्मिन्नग्निमचिनुत
तदियमभवत् ततो वै स प्रत्यतिष्ठद्यां पुरस्तादुपा-दधात् तच्छिरो
ऽभवत् सा प्राची दिग्यां दक्षिणत उपादधात् स दक्षिणः पक्षोऽभवत्
सा दक्षिणा दिग्यां पश्चा-दुपादधात् तत् पुच्छमभवत् सा प्रतीची
दिग्यामुत्तरत उपादधात् – [] 17

TS 5.6.4.3 - Padam

प्रतिष्ठामिति प्रति – स्थाम् । न । अविन्दत । सः । एतत् । अपाम् ।
कुलायम् । अपश्यत् । तस्मिन् । अग्निम् । अचिनुत । तत् ।
इयम् । अभवत् । ततः । वै । सः । प्रतीति । अतिष्ठत् । याम् ।

पु॒रस्ता॑त् । उ॒पाद॑धादि॒त्युप॑ – अद॑धात् । तत् । शि॒रः । अ॒भ॒वत् ।
सा । प्रा॒ची॑ । दिक् । या॒म् । दक्षि॑णतः । उ॒पाद॑धादि॒त्युप॑ – अद॑धात् ।
सः । दक्षि॑णः । पक्षः । अ॒भ॒वत् । सा । दक्षि॑णा । दिक् । या॒म् ।
पश्चा॑त् । उ॒पाद॑धादि॒त्युप॑ – अद॑धात् । तत् । पु॒च्छ॑म् । अ॒भ॒वत् । सा ।
प्र॒तीची॑ । दिक् । या॒म् । उत्त॑रत इत्युत् – तरतः ।
उ॒पाद॑धादि॒त्युप॑ – अद॑धात् । 17 (50)

TS 5.6.4.4

स उत्त॑रः पक्षोऽभ॑वत् सोदी॑ची दि॒ग्यामु॑परि॒ष्टा-दु॒पाद॑धात् तत्
पृ॒ष्ठम॑भ॒वत् सो॒र्ध्वा दि॒गियं॑ वा अ॒ग्निः पञ्चै॑ष्टक-स्तस्मा॒द्-यद॑स्यां
खन॑न्त्यभीष्ट॒कां तृ॒न्दन्त्य॑भि शर्करा॑ सर्वा वा इ॒यं वयो॑भ्यो नक्तं
दृ॒शे दी॑प्यते तस्मा॒दिमां॑ वया॑सि नक्तं ना॒ध्यास॑ते य एवं
वि॒द्वान॒ग्निं चि॑नुते प्रत्ये॒व- [] 18

TS 5.6.4.4 - Padam

सः । उत्त॑र इत्युत् – तरतः । पक्षः । अ॒भ॒वत् । सा । उदी॑ची । दिक् ।
या॒म् । उप॑रि॒ष्टात् । उ॒पाद॑धादि॒त्युप॑ – अद॑धात् । तत् । पृ॒ष्ठम् ।

अ॒भ॒वत् । सा । ऊ॒र्ध्वा । दिक् । इ॒यम् । वै । अ॒ग्निः । प॒ञ्चै॒ष्टक॑
इति॑ प॒ञ्च-इ॒ष्टकः॑ । तस्मा॑त् । यत् । अ॒स्याम् । ख॒नन्ति॑ । अ॒भीति॑ ।
इ॒ष्टकाम् । तृ॒न्दन्ति॑ । अ॒भीति॑ । शर्क॑राम् । सर्वा॑ । वै । इ॒यम् ।
वयो॑भ्य इति॑ वयः - भ्यः । नक्त॑म् । दृ॒शे । दी॒प्यते॑ । तस्मा॑त् ।
इ॒माम् । वया॑सि । नक्त॑म् । न । अधी॑ति । आ॒सते॑ । यः । ए॒वम् ।
वि॒द्वान् । अ॒ग्निम् । चि॒नुते॑ । प्रती॑ति । ए॒व । 18 (50)

TS 5.6.4.5

तिष्ठ॑त्यभि दि॒शो जय॑त्याग्ने॒यो वै ब्रा॒ह्मण॑स्तस्मा॑द्-ब्रा॒ह्मणा॑य सर्वा॑सु
दि॒क्ष्वर्धु॑क॒ स्वा॒मे॒व तद्-दि॒शम॑न्वेत्य॒पां वा॑ अ॒ग्निः कु॒लाय॑
तस्मा॑दापोऽग्नि॑ हारु॒काः स्वा॒मे॒व तद्-यो॒निं प्रवि॑शन्ति ॥ 19

TS 5.6.4.5 - Padam

तिष्ठ॑ति । अ॒भीति॑ । दि॒शः । ज॒यति॑ । आ॒ग्ने॒यः । वै । ब्रा॒ह्मणः॑ ।
तस्मा॑त् । ब्रा॒ह्मणा॑य । सर्वा॑सु । दि॒क्षु । अ॒र्धु॒कम् । स्वा॒म् । ए॒व ।
तत् । दि॒शम् । अ॒न्विति॑ । ए॒ति । अ॒पाम् । वै । अ॒ग्निः । कु॒लाय॑म् ।
तस्मा॑त् । आपः॑ । अ॒ग्निम् । हारु॒काः । स्वा॒म् । ए॒व । तत् ।

योनि॑म् । प्रेति॑ । वि॒श॒न्ति ॥ 19 (32)

(यद॑- ले॒लाय॑थ॒ स-उ॒त्तर॑त॒ उपा॑द॒धा-दे॒व - द्वा॒त्रिं॑श॒च्च) (A4)

TS 5.6.5.1

सँ॒व॒थ्स॒रमु॒ख्यं॑ भृ॒त्वा द्वि॒तीये॑ सँ॒व॒थ्स॒र आ॒ग्नेय॑म॒ष्टाक॑पालं
निर्व॑पेदै॒न्द्र-मे॒काद॑शकपालं वै॒श्वदे॑वं द्वा॒दश॑कपालं बा॒र्ह॒स्पत्यं॑ च॒रुं
वै॒ष्णवं॑ त्रि॒कपालं॑ तृ॒तीये॑ सँ॒व॒थ्स॒रेऽभि॑जिता यजेत यद॒ष्टाक॑पालो
भव॑त्य॒ष्टाक्ष॑रा गाय॒त्र्याग्ने॑यं गाय॒त्रं प्रा॑तस्स॒वनं प्रा॑तस्स॒वनमे॒व
तेन॑ दा॒धार गाय॑त्रीं छ॒न्दो यदे॒काद॑शकपालो भव॑त्ये॒काद॑शाक्ष॒रा
त्रि॒ष्टुगै॒न्द्रं त्रै॒ष्टुभं॑ मा॒द्ध्य॑न्दि॒नं स॒वनं मा॒द्ध्य॑न्दि॒नमे॒व स॒वनं तेन॑
दा॒धार त्रि॒ष्टुभं॑- [] 20

TS 5.6.5.1 - Padam

सँ॒व॒थ्स॒रमि॑ति सं - व॒थ्स॒रम् । उ॒ख्यम् । भृ॒त्वा । द्वि॒तीये॑ । सँ॒व॒थ्स॒र
इति॑ सं - व॒थ्स॒रे । आ॒ग्नेय॑म् । अ॒ष्टाक॑पालमि॒त्य॒ष्टा - क॒पालम् ।
नि॒रिति॑ । व॒पेत् । ऐ॒न्द्रम् । ए॒काद॑शकपालमि॒त्ये॒काद॑श - क॒पालम् ।
वै॒श्वदे॑वमि॒ति वै॒श्व - दे॒वम् । द्वा॒दश॑कपालमि॒ति द्वा॒दश - क॒पालम् ।

बार्॒हस्प॒त्यम् । च॒रुम् । वै॒ष्ण॒वम् । त्रि॒क॒पा॒लमि॒ति त्रि॒ – क॒पा॒लम् ।
तृ॒तीये॑ ॥ सँ॒व॒थ्स॒र इति॑ सं – व॒थ्स॒रे । अ॒भि॒जि॒तेत्य॑भि – जि॒ता ॥
य॒जेत॑ । यत् । अ॒ष्टाक॑पा॒ल इत्य॑ष्टा – क॒पा॒लः । भ॒वति॑ ।
अ॒ष्टाक्ष॑रेत्य॑ष्टा – अ॒क्ष॒रा । गा॒य॒त्री । आ॒ग्ने॒यम् । गा॒य॒त्रम् ।
प्रा॒तस्स॒वनमि॒ति प्रा॒तः – स॒वनम् । प्रा॒तस्स॒वनमि॒ति प्रा॒तः – स॒वनम् ।
ए॒व । ते॒न । दा॒धा॒र । गा॒य॒त्रीम् । छ॒न्दः । यत् । ए॒का॒द॒शक॑पा॒ल
इत्ये॒का॒द॒श – क॒पा॒लः । भ॒वति॑ । ए॒का॒द॒शाक्ष॑रेत्ये॒का॒द॒श – अ॒क्ष॒रा ।
त्रि॒ष्टुक् । ऐ॒न्द्रम् । त्रै॒ष्टु॒भम् । मा॒द्ध्य॑न्दि॒नम् । स॒वनम् । मा॒द्ध्य॑न्दि॒नम् ।
ए॒व । स॒वनम् । ते॒न । दा॒धा॒र । त्रि॒ष्टु॒भम् । 20 (50)

TS 5.6.5.2

छ॒न्दो यद्-द्वा॑द॒शक॑पा॒लो भ॒वति॑ द्वा॒द॒शाक्ष॑रा ज॒गती॑ वै॒श्वदे॒वं जा॑ग॒तं
तृ॒तीय॑स॒वनं तृ॒तीय॑स॒वनमे॒व ते॒न दा॑धा॒र ज॒गतीं॑ छ॒न्दो
यद्-बा॒र्हस्प॒त्यश्च॑रु॒र्भव॑ति ब्र॒ह्म वै दे॒वानां॑ बृ॒हस्प॑तिर्ब्र॒ह्मै॒व
ते॒न दा॑धा॒र यद्-वै॒ष्ण॒वस्त्रि॑क॒पा॒लो भ॒वति॑ य॒ज्ञो वै वि॒ष्णुर्य॑ज्ञमे॒व

तेन॑ दा॒धार॒ यत् तृ॒तीये॑ सँव॒थ्सरे॑ऽभि॒जिता॒ यज॑तेऽभि॒जित्यै॑
यथ् सँव॒थ्सर॑मुख्यं बि॒भर्ती॑ममेव- [] 21

TS 5.6.5.2 - Padam

छन्दः॑ । यत् । द्वा॒दश॑क॒पाल॒ इति॑ द्वा॒दश॑ – क॒पालः॑ । भव॑ति ।
द्वा॒दशाक्ष॑रेति॒ द्वा॒दशा॑-अ॒क्षरा॑ । जग॑ती । वै॒श्वदे॒वमि॑ति॒ वैश्व॑ – दे॒वम् ।
जा॒गतम् । तृ॒तीय॑स॒वनमि॑ति॒ तृतीय॑ – स॒वनम् । तृ॒तीय॑स॒वनमि॑ति
तृतीय॑ – स॒वनम् । ए॒व । तेन॑ । दा॒धार॒ । जग॑तीम् । छन्दः॑ । यत् ।
बा॒र्ह॒स्पत्यः॑ । च॒रुः॑ । भव॑ति । ब्र॒ह्म । वै । दे॒वाना॑म् । बृ॒ह॒स्पतिः॑ ।
ब्र॒ह्म । ए॒व । तेन॑ । दा॒धार॒ । यत् । वै॒ष्णवः॑ । त्रि॒क॒पाल॒ इति॑
त्रि॑ – क॒पालः॑ । भव॑ति । य॒ज्ञः । वै । वि॒ष्णुः॑ । य॒ज्ञम् । ए॒व । तेन॑ ।
दा॒धार॒ । यत् । तृ॒तीये॑ । सँव॒थ्सर॑ इति॒ सं – व॒थ्सरे॑ ।
अ॒भि॒जिते॑त्य॒भि – जि॒ता॑ । यज॑ते । अ॒भि॒जित्या॑ इत्य॒भि – जि॒त्यै॑ ।
यत् । सँव॒थ्सर॑मि॒ति सं – व॒थ्सर॑म् । उ॒ख्यम्॑ । बि॒भर्ति॑ । इ॒मम् ।
ए॒व । 21 (50)

TS 5.6.5.3

तेन॑ लो॒कꣳ स्पृ॑णोति॒ यद् द्वि॒तीये॑ सँव॒थ्सरे॑ऽग्निं चि॒नुते॑ऽन्तरि॑क्षमे॒व
तेन॑ स्पृणोति॒ यत् तृ॒तीये॑ सँव॒थ्सरे॑ यज॒तेऽमु॒मेव॑ तेन॑ लो॒कꣳ
स्पृ॑णोत्ये॒तं वै पर॑ आ॒ट्णारः॑ क॒क्षीवाꣳ औशि॒जो वी॒तह॑व्यः
श्राय॑स॒स्त्रस॑दस्युः पौरु॒कु॒थ्स्यः॑ प्र॒जाका॑मा अचि॒न्वत॑ ततो॒ वै ते
सह॑स्रꣳसह॑स्रं पु॒त्रान॑विन्दन्त॒ प्रथ॑ते प्र॒जया॑ प॒शुभि॒स्तां मा॒त्रामा॑प्नोति॒
यां तेऽग॑च्छन् य॒ एवं () वि॒द्वाने॒तम॑ग्निं चि॒नुते॑ ॥ 22

TS 5.6.5.3 - Padam

तेन॑ । लो॒कम् । स्पृ॑णोति । यत् । द्वि॒तीये॑ । सँव॒थ्सर॑ इति
सं – व॒थ्सरे॑ । अ॒ग्निम् । चि॒नुते॑ । अ॒न्तरि॑क्षम् । ए॒व । तेन॑ ।
स्पृ॑णोति । यत् । तृ॒तीये॑ । सँव॒थ्सर॑ इति सं – व॒थ्सरे॑ । यज॑ते ।
अ॒मुम् । ए॒व । तेन॑ । लो॒कम् । स्पृ॑णोति । ए॒तम् । वै । परः॑ ।
आ॒ट्णारः॑ । क॒क्षीवा॒निति॑ क॒क्षी – वा॒न् । औशि॒जः ।
वी॒तह॑व्य इति वी॒त – ह॒व्यः । श्राय॑सः । त्र॒सद॑स्युः । पौरु॒कु॒थ्स्य
इति पौरु – कु॒थ्स्यः । प्र॒जाका॑मा इति प्र॒जा-का॑माः । अचि॒न्वत॑ ।

ततः॑ । वै॑ । ते॑ । स॒हस्र॑ꣳस॒हस्र॑मि॒ति स॒हस्रं॑ – स॒हस्र॑म् । पु॒त्रान् ।
अ॒वि॒न्दन्त॑ । प्र॒थ॒ते । प्र॒ज॒येति॑ प्र – ज॒या॑ । प॒शुभि॑रिति प॒शु-भिः॑ ।
ताम् । मा॒त्राम् । आ॒प्नो॒ति । या॒म् । ते॑ । अ॒गच्छ॑न् । यः । ए॒वम् () ।
वि॒द्वान् । ए॒तम् । अ॒ग्निम् । चि॒नु॒ते ॥ 22 (54)

(दा॒धार त्रि॒ष्टुभ॑ – मि॒मे॒वै – वं – च॒त्वारि॑ च) (A5)

TS 5.6.6.1

प्र॒जाप॑तिर॒ग्निम॑चिनुत स क्षु॒रप॑वि॒र्भूत्वा॑ऽति॒ष्ठत् तं दे॒वा बि॑भ्यतो
नोपाऽऽ*यन् ते छन्दो॑भि॒रात्मानं॑ छादयित्वा॒पाऽऽ*यन् तच्छ॑न्द॒सां
छन्द॑स्त्वं ब्र॒ह्म वै छ॒न्दाꣳसि॑ ब्र॒ह्मण॑ ए॒तद्-रूपं॑ यत् कृ॒ष्णाजि॑नं
का॒र्ष्णी उ॒पा॒नहा॑वुप॑ मुञ्चते छन्दो॑भि॒रेवाऽऽ*त्मानं॑ छादयित्वाऽग्नि॑मुप॑
चर॑त्या॒त्मनो॑ऽहिꣳसायै दे॒वनि॑धि॒र्वा ए॒ष नि धी॑यते यद॒ग्नि- [] 23

TS 5.6.6.1 - Padam

प्र॒जाप॑तिरिति प्र॒जा – प॒तिः । अ॒ग्निम् । अ॒चि॒नु॒त । सः ।
क्षु॒रप॑विरिति क्षु॒र – प॒विः । भू॒त्वा । अ॒ति॒ष्ठत् । तम् । दे॒वाः ।
बि॑भ्यतः । न । उ॒पेति॑ । आ॒यन् । ते । छ॒न्दोभि॑रिति छ॒न्दः – भिः ।

आ॒त्मान॑म् । छा॒दयि॑त्वा । उपे॒ति॑ । आ॒यन् । तत् । छन्द॑साम् ।
छन्द॑स्त्वमि॒ति॑ छन्दः – त्वम् । ब्र॒ह्म । वै । छन्दा॑सि । ब्र॒ह्मणः॑ ।
ए॒तत् । रू॒पम् । यत् । कृ॒ष्णाजि॑नमि॒ति॑ कृष्ण – अ॒जिन॑म् ।
का॒र्ष्णी इति॑ । उ॒पा॒नहौ॑ । उपे॒ति॑ । मु॒ञ्च॒ते । छन्दो॑भिरि॒ति॑
छन्दः॑ – भिः । ए॒व । आ॒त्मान॑म् । छा॒दयि॑त्वा । अ॒ग्नि॑म् । उपे॒ति॑ ।
च॒र॒ति॑ । आ॒त्म॒नः । अहि॑स्यै । दे॒व॒निधि॑रि॒ति॑ दे॒व – निधिः॑ । वै ।
ए॒षः । नी॒ति॑ । धी॒य॒ते॑ । यत् । अ॒ग्निः । 23 (50)

TS 5.6.6.2

–र॒न्ये वा वै नि॒धि॒म॒गु॒प्तं वि॒न्द॒न्ति॒ न वा प्र॒ति प्र॒ जा॒ना॒त्यु॒खामा॑
क्रा॒म॒त्या॒त्मा॒नमे॒वाधि॑पां कुरु॒ते गु॒प्त्या॒ अथो॒ ख॒ल्वाहु॑र्नाऽऽक्र॒म्येति॑
नैर्ऋ॒त्यु॒खा यदा॑क्रा॒मे॒न्निर्ऋ॒त्या आ॒त्मा॒नम॑पि द॒द्ध्यात्
तस्मा॒न्नाऽऽक्र॒म्या पु॒रुष॑शीर्षमु॒प द॑धाति गु॒प्त्या॒ अथो॒ यथा॑
ब्रू॒यादे॒तन्मे गो॒पा॒येति॑ तादृ॒गे॒व तत्– [] 24

TS 5.6.6.2 - Padam

अ॒न्ये । वा॒ । वै । नि॒धि॒मि॒ति॒ नि – धि॒म् । अ॒गु॒प्त॒म् । वि॒न्द॒न्ति॒ । न ।
वा॒ । प्र॒ति॒ । प्रे॒ति॒ । जा॒ना॒ति॒ । उ॒खाम् । ए॒ति॒ । क्रा॒म॒ति॒ । आ॒त्मान॑म् ।
ए॒व । अ॒धि॒पा॒मि॒त्य॒धि – पा॒म् । कु॒रु॒ते॒ । गु॒प्त्यै॑ । अ॒थो इ॒ति॒ । ख॒लु॑ ।
आ॒हुः॒ । न । आ॒क्र॒म्ये॒त्या – क्र॒म्या॑ । इ॒ति॒ । नैर्ऋ॒ती॒ति॒ नैः-ऋ॒ती॒ ।
उ॒खा । यत् । आ॒क्रा॒मे॒दि॒त्या – क्रा॒मे॒त् । निर्ऋ॒त्या इ॒ति॒ निः-ऋ॒त्यै॑ ।
आ॒त्मान॑म् । अ॒पी॒ति॒ । द॒द्ध्य॒ात् । तस्मा॑त् । न । आ॒क्र॒म्ये॒त्या-क्र॒म्या॑ ।
पु॒रु॒ष॒शीर्॒ष॒मि॒ति॒ पु॒रु॒ष – शी॒र्ष॒म् । उ॒पे॒ति॒ । द॒धा॒ति॒ । गु॒प्त्यै॑ ।
अ॒थो इ॒ति॒ । य॒था॑ । ब्रू॒यात् । ए॒तत् । मे॒ । गो॒पा॒य॒ । इ॒ति॒ । ता॒दृक् ।

ए॒व । तत् । 24 (50)

TS 5.6.6.3

प्र॒जा॒प॒ति॒र्वा अ॒थ॒र्वा ऽग्नि॒रे॒व द॒द्ध्य॒ङ्गा॒थ॒र्व॒ण॒स्त॒स्ये॒ष्ट॒का
अ॒स्थान्ये॒त॒ ह वा॒व तद्-ऋ॒षि॒र॒भ्य॒नू॒वा॒चे॒न्द्रो द॒धी॒चो अ॒स्थ॒भि॒रि॒ति॒
यदि॑ष्ट॒का॒भि॒र॒ग्निं चि॒नो॒ति॒ सा॒त्मा॒न॒मे॒वा॒ग्निं चि॒नु॒ते॒ सा॒त्मा॒मु॒ष्मिन् लो॒के॒

भवति॑ य॒ एवं॑ वै॒द शरी॑रं॒ वा ए॒तद् अ॒ग्नेर्य॑च्चि॒त्य आ॒त्मा वै॑श्वा॒नरो
यच्चि॒ते वै॑श्वा॒नरं॑ जु॒होति॑ शरी॒रमे॒व स॒ऽस्कृ॒त्या- [] 25

TS 5.6.6.3 - Padam

प्र॒जाप॑तिरि॒ति प्र॒जा - प॒तिः । वै । अथ॑र्वा । अ॒ग्निः । ए॒व । द॒द्ध्य॑ङ् ।
आथ॑र्वणः । तस्य॑ । इ॒ष्टकाः॑ । अ॒स्थानि॑ । ए॒तम् । ह॒ । वा॒व । तत् ।
ऋ॒षिः । अ॒भ्यनू॑वा॒चेत्य॑भि - अ॒नूवा॑च । इ॒न्द्रः । द॒धी॒चः ।
अ॒स्थभि॑रि॒त्यस्थ॑ - भिः । इति॑ । यत् । इ॒ष्टका॑भिः । अ॒ग्निम् ।
चि॒नोति॑ । सा॒त्मान॑मि॒ति स - आ॒त्मान॑म् । ए॒व । अ॒ग्निम् । चि॒नु॒ते ।
सा॒त्मेति॑ स - आ॒त्मा । अ॒मुष्मि॑न् । लो॒के । भ॒वति॑ । यः । ए॒वम् ।
वे॒द । शरी॑रम् । वै । ए॒तत् । अ॒ग्नेः । यत् । चि॒त्यः । आ॒त्मा ।
वैश्वा॒नरः॑ । यत् । चि॒ते । वैश्वा॒नरम् । जु॒होति॑ । शरी॒रम् । ए॒व ।
स॒ऽस्कृ॒त्य । 25 (50)

TS 5.6.6.4

-भ्या॑रो॒हति॑ शरी॒रं॒ वा ए॒तद्-य॑ज॒मानः॑ स॒ऽस्कु॑रु॒ते य॒दग्निं॑ चि॒नु॒ते
यच्चि॒ते वै॑श्वा॒नरं॑ जु॒होति॑ शरी॒रमे॒व स॒ऽस्कृ॒त्या ऽऽ*॒त्मना॑ऽभ्या॑रो॒हति॑

तस्मात् तस्य नाव द्यन्ति जीवन्नेव देवानप्येति वैश्वानर्यर्चा पुरीषमुप
दधातीयं वा अग्निर्वैश्वानरस्तस्यैषा चितिर्यत् पुरीषमग्निमेव
वैश्वानरं चिनुत एषा वा अग्नेः () प्रिया तनूर्यद्-वैश्वानरः
प्रियामेवास्य तनुवमव रुन्धे ॥ 26

TS 5.6.6.4 - Padam

अभ्यारोहतीत्यभि – आरोहति । शरीरम् । वै । एतत् । यजमानः ।
समिति । कुरुते । यत् । अग्निम् । चिनुते । यत् । चिते । वैश्वानरम् ।
जुहोति । शरीरम् । एव । स॒स्कृत्य॑ । आत्मना॑ ।
अभ्यारोहतीत्यभि – आरोहति । तस्मात् । तस्य । न । अवेति ।
द्यन्ति । जीवन् । एव । देवान् । अपीति । एति । वैश्वानर्या । ऋचा ।
पुरीषम् । उपेति । दधाति । इयम् । वै । अग्निः । वैश्वानरः । तस्य ।
एषा । चितिः । यत् । पुरीषम् । अग्निम् । एव । वैश्वानरम् । चिनुते ।
एषा । वै । अग्नेः () । प्रिया । तनूः । यत् । वैश्वानरः । प्रियाम् ।
एव । अस्य । तनुवम् । अवेति । रुन्धे ॥ 26 (60)

(अग्नि - स्तथ् - स॒स्कृत्या - ग्ने - दर्श॑ च) (A6)

TS 5.6.7.1

अग्ने॑र्वै दी॒क्षया॑ दे॒वा वि॒राज॑माप्नुवन् तिस्रो रा॒त्रीर्दी॑क्षितः स्यात्
त्रि॒पदा॑ वि॒राड् वि॒राज॑माप्नोति षड्-रा॒त्रीर्दी॑क्षितः स्याथ् षड् वा
ऋ॒तवः॑ सँव॒थ्सरः॑ सँव॒थ्सरो॑ वि॒राड् वि॒राज॑माप्नोति दश रा॒त्रीर्दी॑क्षितः
स्याद्-द॒शाक्ष॑रा वि॒राड् वि॒राज॑माप्नोति द्वाद॒श रा॒त्रीर्दी॑क्षितः स्याद्
द्वाद॒श मा॒साः सँव॒थ्सरः॑ सँव॒थ्सरो॑ वि॒राड् वि॒राज॑माप्नोति त्रयो॒दश
रा॒त्रीर्दी॑क्षितः स्यात् त्रयो॒दश - [] 27

TS 5.6.7.1 - Padam

अग्नेः॑ । वै । दी॒क्षया॑ । दे॒वाः । वि॒राज॑मि॒ति वि-राज॑म् । आ॒प्नु॒वन् ।
ति॒स्रः । रा॒त्रीः । दी॒क्षितः॑ । स्यात् । त्रि॒पदे॑ति त्रि - पदा॑ ।
वि॒राडि॑ति वि - राट् । वि॒राज॑मि॒ति वि - राज॑म् । आ॒प्नो॒ति । षट् ।
रा॒त्रीः । दी॒क्षितः॑ । स्यात् । षट् । वै । ऋ॒तवः॑ । सँव॒थ्सर॑ इति
सं - व॒थ्सरः॑ । सँव॒थ्सर॑ इति सं - व॒थ्सरः॑ । वि॒राडि॑ति वि-राट् ।
वि॒राज॑मि॒ति वि - राज॑म् । आ॒प्नो॒ति । दश॑ । रा॒त्रीः । दी॒क्षितः॑ ।

स्यात् । द॒शाक्ष॑रेति॒ द॒श – अ॒क्ष॒रा । वि॒राडि॑ति॒ वि – राट् ।
 वि॒राज॑मिति॒ वि – रा॒जम् । आ॒प्नो॑ति । द्वा॒द॒श । रा॒त्रीः । दी॒क्षि॒तः ।
 स्यात् । द्वा॒द॒श । मा॒साः । सँ॒व॒थ्स॒र इति॑ सं – व॒थ्स॒रः ।
 सँ॒व॒थ्स॒र इति॑ सं – व॒थ्स॒रः । वि॒राडि॑ति॒ वि – राट् । वि॒राज॑मिति॒
 वि – रा॒जम् । आ॒प्नो॑ति । त्रयो॑द॒शेति॒ त्रयः॑ – द॒श । रा॒त्रीः ।
 दी॒क्षि॒तः । स्यात् । त्रयो॑द॒शेति॒ त्रयः॑ – द॒श । 27 (50)

TS 5.6.7.2

मा॒साः सँ॒व॒थ्स॒रः सँ॒व॒थ्स॒रो वि॒राड् वि॒राज॑माप्नोति॒ पञ्च॑द॒श
 रा॒त्रीर्दी॑क्षितः स्यात् पञ्च॑द॒श वा अ॒र्ध॒मा॒सस्य॑ रा॒त्रयो॑ऽर्ध॒मा॒स॒शः
 सँ॒व॒थ्स॒र आ॒प्यते॑ सँ॒व॒थ्स॒रो वि॒राड् वि॒राज॑माप्नोति॒ सप्त॑द॒श
 रा॒त्रीर्दी॑क्षितः स्याद् द्वा॒द॒श मा॒साः पञ्च॑र्त॒वः स सँ॒व॒थ्स॒रः
 सँ॒व॒थ्स॒रो वि॒राड् वि॒राज॑माप्नोति॒ चतु॑र्विं॒शति॑ꣳ रा॒त्रीर्दी॑क्षितः
 स्या॒-च॒तुर्विं॑शति॒र्ध॒मा॒साः सँ॒व॒थ्स॒रः सँ॒व॒थ्स॒रो वि॒राड्
 वि॒राज॑माप्नोति॒ त्रिं॑श॒तꣳ रा॒त्रीर्दी॑क्षितः स्यात् – [] 28

TS 5.6.7.2 - Padam

मा॒साः । सँ॒व॒थ्स॒र इति॑ सं-व॒थ्स॒रः । सँ॒व॒थ्स॒र इति॑ सं-व॒थ्स॒रः ।
वि॒राडि॑ति वि - राट् । वि॒राज॑मि॒ति वि - राज॑म् । आ॒प्नो॒ति ।
पञ्च॑द॒शेति॑ पञ्च - द॒श । रा॒त्रीः । दी॒क्षि॒तः । स्या॒त् । पञ्च॑द॒शेति॑
पञ्च - द॒श । वै । अ॒र्ध॒मा॒सस्ये॑त्य॒र्ध - मा॒सस्य॑ । रा॒त्रयः॑ ।
अ॒र्ध॒मा॒स॒श इत्य॑र्ध॒मा॒स - शः । सँ॒व॒थ्स॒र इति॑ सं - व॒थ्स॒रः ।
आ॒प्य॒ते । सँ॒व॒थ्स॒र इति॑ सं - व॒थ्स॒रः । वि॒राडि॑ति वि - राट् ।
वि॒राज॑मि॒ति वि - राज॑म् । आ॒प्नो॒ति । स॒प्तद॑शेति॑ स॒प्त - द॒श ।
रा॒त्रीः । दी॒क्षि॒तः । स्या॒त् । द्वा॒द॒श । मा॒साः । पञ्च॑ । ऋ॒त॒वः । सः ।
सँ॒व॒थ्स॒र इति॑ सं - व॒थ्स॒रः । सँ॒व॒थ्स॒र इति॑ सं - व॒थ्स॒रः ।
वि॒राडि॑ति वि - राट् । वि॒राज॑मि॒ति वि - राज॑म् । आ॒प्नो॒ति ।
च॒तुर्वि॑ंश॒तिमि॒ति च॒तुः - वि॑ंश॒तिम् । रा॒त्रीः । दी॒क्षि॒तः । स्या॒त् ।
च॒तुर्वि॑ंश॒तिरि॒ति च॒तुः - वि॑ंश॒तिः ।
अ॒र्ध॒मा॒सा इत्य॑र्ध॒मा॒साः । सँ॒व॒थ्स॒र इति॑ सं - व॒थ्स॒रः ।

सँव॒थ्स॒र इति॑ सं – व॒थ्स॒रः । वि॒राडि॑ति वि – राट् ।

वि॒राज॑मि॒ति वि – राज॑म् । आ॒प्नो॒ति । त्रि॒ंश॑तम् । रा॒त्रीः ।

दी॒क्षितः॑ । स्यात् । 28 (50)

TS 5.6.7.3

त्रि॒ंश॑दक्ष॒रा वि॒राड् वि॒राज॑मा॒प्नोति॑ मा॒सं दी॒क्षितः॑ स्याद्-यो मा॒सः
स सँव॒थ्स॒रः सँव॒थ्स॒रो वि॒राड् वि॒राज॑मा॒प्नोति॑ च॒तुरो॑ मा॒सो दी॒क्षितः॑
स्या॑च्च॒तुरो॑ वा ए॒तं मा॒सो वस॑वोऽबि॒भरु॑स्ते पृ॒थि॒वीमा॑ज्जयन् गाय॒त्रीं
छन्दो॑ऽष्टौ रु॒द्रास्ते-॑ऽन्तरि॑क्षमा॑ज्जयन् त्रि॒ष्टुभं॑ छन्दो॑ द्वाद॒शा-
ऽऽदि॒त्यास्ते॑ दि॒वमा॑ज्जयन् जग॑तीं छन्द॒स्ततो॑ वै ते ()
व्या॒वृत॑-मगच्छ॒ञ्छ्रैष्यं॑ दे॒वानां॑ तस्मा॑द् द्वाद॒श मा॒सो भृ॒त्वाऽग्निं॑
चिन्वी॑त द्वाद॒श मा॒साः सँव॒थ्स॒रः सँव॒थ्स॒रो -ऽग्नि॑श्चित्यस्तस्या-
हो॒रात्रा॑णीष्ट॒का आ॒प्तेष्ट॑कमे॒नं चि॒नुते॑ऽथो॒ व्या॒वृत॑मे॒व गच्छ॑ति
श्रै॒ष्यञ् समाना॑नां ॥ 29

TS 5.6.7.3 - Padam

त्रि॒ंश॒दक्ष॑रेति॒ त्रि॒ंश॒त् – अ॒क्ष॒रा । वि॒राडि॑ति॒ वि – राट् ।
वि॒राज॑मिति॒ वि – राज॑म् । आ॒प्नो॑ति । मा॒सम् । दी॒क्षितः॑ । स्या॒त् ।
यः । मा॒सः । सः । सँ॒व॒थ्स॒र इति॑ सं – व॒थ्स॒रः । सँ॒व॒थ्स॒र इति॑
सं – व॒थ्स॒रः । वि॒राडि॑ति॒ वि – राट् । वि॒राज॑मिति॒ वि – राज॑म् ।
आ॒प्नो॑ति । च॒तुरः॑ । मा॒सः । दी॒क्षितः॑ । स्या॒त् । च॒तुरः॑ । वै । ए॒तम् ।
मा॒सः । व॒स॒वः । अ॒बि॒भ॒रुः । ते । पृ॒थि॒वीम् । ए॒ति । अ॒ज॒य॒न् ।
गा॒य॒त्रीम् । छ॒न्दः॑ । अ॒ष्टौ । रु॒द्राः । ते । अ॒न्त॒रि॒क्षम् । ए॒ति । अ॒ज॒य॒न् ।
त्रि॒ष्टु॒भम् । छ॒न्दः॑ । द्वा॒द॒श । आ॒दि॒त्याः । ते । दि॒वम् । ए॒ति । अ॒ज॒य॒न् ।
ज॒ग॒तीम् । छ॒न्दः॑ । त॒तः । वै । ते () । व्या॒वृ॒त॒मि॒ति॒ वि – आ॒वृ॒त॒म् ।
अ॒ग॒च्छ॒न् । श्रै॒ष्ठ्य॑म् । दे॒वा॒नाम् । तस्मा॑त् । द्वा॒द॒श । मा॒सः । भृ॒त्वा ।
अ॒ग्नि॑म् । चि॒न्वी॑त । द्वा॒द॒श । मा॒साः । सँ॒व॒थ्स॒र इति॑ सं – व॒थ्स॒रः ।
सँ॒व॒थ्स॒र इति॑ सं – व॒थ्स॒रः । अ॒ग्निः । चि॒त्यः । तस्य॑ ।
अ॒हो॒रा॒त्रा॒णीत्य॑हः – रा॒त्रा॒णि । इ॒ष्ट॒काः । आ॒प्ते॒ष्ट॒क॒मि॒त्याप्त॑-इ॒ष्ट॒कम् ।
ए॒नम् । चि॒नु॒ते । अ॒थो इति॑ । व्या॒वृ॒त॒मि॒ति॒ वि – आ॒वृ॒त॒म् । ए॒व ।

गच्छति । श्रैष्ठ्यम् । समानानाम् ॥ 29 (78) (स्यात् त्रयोदश –
त्रिंशत् रात्रीर्दीक्षितः स्याद् – वै ते – षाविंशतिश्च) (A7)
TS 5.6.8.1

सुवर्गाय वा एष लोकाय चीयते यदग्निस्तं यन्नान्वारोहेत्
सुवर्गाल्लोकाद्-यजमानो हीयेत पृथिवीमाऽक्रमिषं प्राणो मा मा
हासीदन्तरिक्षमाऽक्रमिषं प्रजा मा मा हासीद्-दिवमाऽक्रमिषं
सुवर्गन्मेत्याहैष वा अग्नेरन्वारोहस्तेनैवैन-मन्वारोहति सुवर्गस्य
लोकस्य समष्ट्यै यत् पक्षसम्मितां मिनुयात् – [] 30

TS 5.6.8.1 - Padam

सुवर्गायेति सुवः – गाय । वै । एषः । लोकाय । चीयते । यत् ।
अग्निः । तम् । यत् । न । अन्वारोहेदित्यनु – आरोहेत् ।
सुवर्गादिति सुवः-गात् । लोकात् । यजमानः । हीयेत । पृथिवीम् ।
एति । अक्रमिषम् । प्राण इति प्र – अनः । मा । मा । हासीत् ।
अन्तरिक्षम् । एति । अक्रमिषम् । प्रजेति प्र – जा । मा । मा ।
हासीत् । दिवम् । एति । अक्रमिषम् । सुवः । अगन्म । इति ।

आ॒ह । ए॒षः । वै । अ॒ग्नेः । अ॒न्वा॒रो॒ह इ॒त्य॒नु-आ॒रो॒हः । ते॒न । ए॒व ।
ए॒नम् । अ॒न्वा॒रो॒ह॒ती॒त्य॒नु – आ॒रो॒ह॒ति । सु॒वर्ग॑स्येति सु॒वः – ग॒स्य ।
लो॒क॒स्य । स॒म॒ष्ट्या इति सं – अ॒ष्ट्यै । यत् ।

पक्ष॑स॒मि॒तामि॒ति पक्ष॑ – स॒मि॒ताम् । मि॒नु॒यात् । 30 (50)

TS 5.6.8.2

कनी॑या॒सं य॒ज्ञक्र॑तुमु॒पेया॑त् पा॒पी॒य॒स्य॒स्या ऽऽत्म॑नः प्र॒जा
स्याद्-वे॒दि॒स॒मि॒तां मि॒नोति॑ ज्या॒या॒समे॒व य॒ज्ञक्र॑तुमु॒पैति॑
ना॒स्याऽऽ*त्म॑नः पा॒पी॒य॒सी प्र॒जा भ॑वति सा॒हस्रं॑ चि॒न्वीत॑ प्रथ॒मं
चि॒न्वा॒नः स॒हस्र॑स॒मि॒तो वा अ॒यं लो॒क इ॒ममे॒व लो॒कम॒भि ज॑यति
द्वि॒षा॒हस्रं॑ चि॒न्वीत॑ द्वि॒तीयं॑ चि॒न्वा॒नो द्वि॒षा॒हस्रं॑ वा अ॒न्तरि॑क्ष-
म॒न्तरि॑क्षमे॒वाभि॑ ज॒यति॑ त्रि॒षा॒हस्रं॑ चि॒न्वीत॑ तृ॒तीयं॑ चि॒न्वा॒न – [] 31

TS 5.6.8.2 - Padam

कनी॑या॒सम् । य॒ज्ञक्र॑तुमि॒ति य॒ज्ञ – क्र॑तुम् । उ॒पेति॑ । इ॒यात् ।
पा॒पी॒य॒सी । अ॒स्य । आ॒त्म॑नः । प्र॒जेति॑ प्र – जा । स्यात् ।
वे॒दि॒स॒मि॒तामि॒ति वे॒दि – स॒मि॒ताम् । मि॒नोति॑ । ज्या॒या॒सम् । ए॒व ।

य॒ज्ञ॒क्र॒तु॒मि॒ति॑ य॒ज्ञ – क्र॒तुम् । उ॒पे॒ति॑ । ए॒ति॒ । न । अ॒स्य॒ । आ॒त्म॒नः॑ ।
पा॒पी॒य॒सी । प्र॒जे॒ति॑ प्र – जा । भ॒व॒ति॒ । सा॒ह॒स्र॒म् । चि॒न्वी॒त ।
प्र॒थ॒म॒म् । चि॒न्वा॒नः॑ । स॒ह॒स्र॒स॒म्मित॒ इति॑ स॒ह॒स्र – स॒म्मितः॑ । वै ।
अ॒य॒म् । लो॒कः॑ । इ॒म॒म् । ए॒व । लो॒क॒म् । अ॒भी॒ति॑ । ज॒य॒ति॒ ।
द्वि॒षा॒ह॒स्र॒मि॒ति॑ द्वि – सा॒ह॒स्र॒म् । चि॒न्वी॒त । द्वि॒तीय॑म् । चि॒न्वा॒नः॑ ।
द्वि॒षा॒ह॒स्र॒मि॒ति॑ द्वि – सा॒ह॒स्र॒म् । वै । अ॒न्त॒रि॒क्ष॒म् । अ॒न्त॒रि॒क्ष॒म् । ए॒व ।
अ॒भी॒ति॑ । ज॒य॒ति॒ । त्रि॒षा॒ह॒स्र॒मि॒ति॑ त्रि – सा॒ह॒स्र॒म् । चि॒न्वी॒त ।
तृ॒तीय॑म् । चि॒न्वा॒नः॑ । 31 (50)

TS 5.6.8.3

–स्त्रि॒षा॒ह॒स्रो॒ वा अ॒सौ लो॒को ऽमु॒मे॒व लो॒क॒म॒भि ज॒य॒ति॑ जा॒नु॒द॒घ्नं
चि॒न्वी॒त प्र॒थ॒मं चि॒न्वा॒नो गा॒य॒त्रि॒यै॒वे॒मं लो॒क॒म॒भ्या॒रो॒ह॒ति॑ ना॒भि॒द॒घ्नं
चि॒न्वी॒त द्वि॒तीयं॑ चि॒न्वा॒नस्त्रि॒ष्टु॒भै॒वा–न्त॒रि॒क्ष–म॒भ्या॒रो॒ह॒ति॑ ग्री॒व॒द॒घ्नं
चि॒न्वी॒त तृ॒तीयं॑ चि॒न्वा॒नो ज॒ग॒त्यै॒वा॒मु॒न् लो॒क॒म॒भ्या॒रो॒ह॒ति॑ ना॒ग्निं
चि॒त्वा रा॒मा॒मु॒पे॒या॒द॒यो॒नौ रे॒तो धा॒स्या॒मी॒ति॒ न द्वि॒तीयं॑ चि॒त्वाऽन्य॒स्य
स्त्रि॒य– [] 32

TS 5.6.8.3 - Padam

त्रि॑षा॒हस्र॑ इति॒ त्रि॑ – सा॒हस्रः॑ । वै । अ॒सौ । लो॒कः । अ॒मुम् । ए॒व ।
लो॒कम् । अ॒भीति॑ । ज॒यति॑ । जा॒नुद॒घ्नमि॑ति॒ जानु॑ – द॒घ्नम् ।
चि॒न्वीत॑ । प्र॒थम॑म् । चि॒न्वानः॑ । गा॒यत्रि॑या । ए॒व । इ॒मम् । लो॒कम् ।
अ॒भ्यारो॑ह॒तीत्य॑भि – आ॒रोह॑ति । ना॒भिद॒घ्नमि॑ति॒ नाभि॑ – द॒घ्नम् ।
चि॒न्वीत॑ । द्वि॒तीय॑म् । चि॒न्वानः॑ । त्रि॒ष्टुभा॑ । ए॒व । अ॒न्तरि॑क्षम् ।
अ॒भ्यारो॑ह॒तीत्य॑भि – आ॒रोह॑ति । ग्री॒वद॒घ्नमि॑ति॒ ग्रीव॑ – द॒घ्नम् ।
चि॒न्वीत॑ । तृ॒तीय॑म् । चि॒न्वानः॑ । जग॑त्या । ए॒व । अ॒मुम् । लो॒कम् ।
अ॒भ्यारो॑ह॒तीत्य॑भि – आ॒रोह॑ति । न । अ॒ग्निम् । चि॒त्वा । रा॒माम् ।
उ॒पेति॑ । इ॒यात् । अ॒यो॒नौ । रे॒तः । धा॒स्यामि॑ । इति॑ । न । द्वि॒तीय॑म् ।
चि॒त्वा । अ॒न्यस्य॑ । स्त्रि॒यम् । 32 (50)

TS 5.6.8.4

–मु॒पेया॑न्न तृ॒तीयं॑ चि॒त्वा कां॑ च॒नोपे॑याद्–रे॒तो वा ए॒तन्नि॑ ध॒त्ते यद॒ग्निं॑
चि॒नुते॑ यदु॒पेया॑द्–रे॒तसा॑ व्य॒दध्ये॑ताऽथो॒ खल्वा॑हुर प्रज॒स्यं तद्–
यन्नो॒पेया॑दिति॒ यद्–रे॒तस्सि॑चावुप॒दधा॑ति॒ ते ए॒व यज॑मानस्य

रेतो॑ बिभृ॑तस्तस्मा॒-दुपे॑याद्-रेत॒सो-ऽस्क॑न्दाय॒ त्रीणि॒ वाव॒ रेता॑ँसि

पिता॒ पु॒त्रः पौ॒त्रो- [] 33

TS 5.6.8.4 - Padam

उपेति॑ । इ॒यात् । न । तृ॒तीयम् । चि॒त्वा । का॒म् । च॒न । उपेति॑ ।
इ॒यात् । रेतः॑ । वै । ए॒तत् । नीति॑ । ध॒त्ते । यत् । अ॒ग्निम् । चि॒नुते ।
यत् । उ॒पेया॑दित्युप - इ॒यात् । रेत॑सा । वीति॑ । ऋ॒द्ध्येत॑ । अथो
इति॑ । ख॒लु । आ॒हुः । अ॒प्रज॑स्यमित्यप्र-ज॒स्यम् । तत् । यत् । न ।
उ॒पेया॑दित्युप - इ॒यात् । इति॑ । यत् । रे॒तस्सि॑चा॒विति॑ रेतः - सिचौ॑ ।
उ॒प॒द॒धा॒तीत्युप॑ - द॒धाति॑ । ते इति॑ । ए॒व । यज॑मानस्य । रेतः॑ ।
बिभृ॑तः । तस्मा॑त् । उपेति॑ । इ॒यात् । रेत॑सः । अ॒स्क॑न्दाय । त्रीणि॑ ।
वाव॑ । रेता॑ँसि । पिता॑ । पु॒त्रः । पौ॒त्रः । 33 (50)

TS 5.6.8.5

यद् द्वे॑ रे॒तस्सि॑चा॒वुप॑द॒ध्याद्-रेतो॑ऽस्य॒ विच्छि॑न्दात् ति॒स्र उप॑ द॒धाति॑
रेत॑सः सं॒त॒त्या इ॒यं वा॑व प्रथ॒मा रे॒तस्सि॑ग् वा॒ग्वा इ॒यं तस्मा॑त्
प॒श्यन्ती॑मां प॒श्यन्ति॑ वा॒चं व॑दन्तीमन्तरि॒क्षं द्वि॒तीया॑ प्रा॒णो वा

अ॒न्तरि॑क्षं तस्मान्ना॒न्तरि॑क्षं पश्य॑न्ति न प्रा॒णम॒सौ तृ॒तीया॒ चक्षु॑र्वा
अ॒सौ तस्मा॑त् पश्य॑न्त्य॒मूं पश्य॑न्ति चक्षु॑र्यजु॒षेमां॑ चा – [] 34

TS 5.6.8.5 - Padam

यत् । द्वे॑ इति॑ । रे॒तस्सि॑चा॒विति॑ रे॒तः-सि॑चौ ।
उ॒प॒द॒द्ध्य॑दि॒त्युप॑-द॒ध्यात् । रे॒तः । अ॒स्य । वी॒ति । छि॒न्धा॒त् । ति॒स्रः ।
उ॒पेति॑ । द॒धाति॑ । रे॒तसः॑ । सं॒त॒त्या इति॑ सं – त॒त्यै । इ॒यम् । वा॒व ।
प्र॒थ॒मा । रे॒तस्सि॑गि॒ति रे॒तः – सि॑क् । वाक् । वै । इ॒यम् । तस्मा॑त् ।
पश्य॑न्ति । इ॒माम् । पश्य॑न्ति । वा॒चम् । वद॑न्तीम् । अ॒न्तरि॑क्षम् ।
द्वि॒तीया॑ । प्रा॒ण इति॑ प्र – अ॒नः । वै । अ॒न्तरि॑क्षम् । तस्मा॑त् । न ।
अ॒न्तरि॑क्षम् । पश्य॑न्ति । न । प्रा॒णमि॑ति प्र – अ॒नम् । अ॒सौ । तृ॒तीया॑ ।
चक्षुः॑ । वै । अ॒सौ । तस्मा॑त् । पश्य॑न्ति । अ॒मूम् । पश्य॑न्ति । चक्षुः॑ ।
यजु॑षा । इ॒माम् । च । 34 (50)

TS 5.6.8.6

-मूं चो॒प द॒धाति॑ म॒नसा॑ म॒द्ध्य॒मामे॒षां लो॒कानां॑ क्लृ॒प्त्या अ॒थो
प्रा॒णाना॑मि॒ष्टो य॒ज्ञो भृ॑गुभि॒राशी॒र्दा वसु॑भि॒स्तस्य॑ त इ॒ष्टस्य॑ वी॒तस्य॑

द्र॒वि॒णे॒ह भ॒क्षी॒ये॒त्या॒ह स्तु॒त॒श॒स्त्रे ए॒वै॒ते॒न दु॒हे पि॒ता मा॒तरि॒श्वाऽच्छि॒द्रा
प॒दा धा॒ अ॒च्छि॒द्रा उ॒शि॒जः प॒दाऽनु॒ तक्षुः॑ सो॒मो वि॒श्ववि॒न्ने॒ता
ने॒षद्-बृ॒ह॒स्पति॑रु॒क्था॒म॒दा॒नि श॒ऽसि॒षदि॒त्याहै॒तद्वा () अ॒ग्ने॒रु॒क्थं
ते॒नै॒वैन॒मनु॑ श॒ऽसति॑ ॥ 35

TS 5.6.8.6 - Padam

अ॒मू॒म् । च॒ । उ॒पेति॑ । द॒धा॒ति । म॒न॒सा । म॒द्ध्य॒माम् । ए॒षाम् ।
लो॒का॒ना॒म् । क्लृ॒प्त्यै॑ । अथो॒ इति॑ । प्रा॒णा॒ना॒मिति॑ प्र – अ॒ना॒ना॒म् ।
इ॒ष्टः । य॒ज्ञः । भृ॒गुभि॑रिति॒ भृ॒गु – भिः॑ । आ॒शी॒र्दा इ॒त्या॒शीः – दाः॑ ।
व॒सुभि॑रिति॒ व॒सु – भिः॑ । त॒स्य । ते । इ॒ष्टस्य॑ । वी॒त॒स्य । द्र॒वि॒णा ।
इ॒ह । भ॒क्षी॒य । इति॑ । आ॒ह । स्तु॒त॒श॒स्त्रे इति॑ स्तु॒त – श॒स्त्रे । ए॒व ।
ए॒ते॒न । दु॒हे । पि॒ता । मा॒तरि॒श्वा । अ॒च्छि॒द्रा । प॒दा । धाः॑ । अ॒च्छि॒द्राः ।
उ॒शि॒जः । प॒दा । अ॒न्विति॑ । त॒क्षुः । सो॒मः ।
वि॒श्ववि॑दिति॒ विश्व॑ – वि॒त् । ने॒ता । ने॒षत् । बृ॒ह॒स्पतिः॑ ।
उ॒क्था॒म॒दा॒नीत्यु॑क्थ – म॒दा॒नि । श॒ऽसि॒षत् । इति॑ । आ॒ह । ए॒तत् ।

वै () । अग्नेः । उक्थम् । तेन । एव । एनम् । अन्विति ।

श॒स॒ति ॥ 35 (57) (मि॒नु॒यात् – तृ॒तीयं॑ चि॒न्वा॒नः – स्त्रि॒यं – पौ॒त्र
– श्व – वै – स॒प्त च॑) (A8)

TS 5.6.9.1

सू॒य॒ते वा ए॒षो॒ऽग्नी॒नां य॑ उ॒खायां॑ भ्रि॒य॒ते य॒दधः॑ सा॒दये॒द्-ग॒र्भाः
प्र॒पा॒दु॒काः स्यु॒रथो॑ यथा॑ स॒वात् प्र॒त्यव॑रोहति तादृ॒गेव॑ तदा॒स॒न्दी
सा॒दय॑ति ग॒र्भाणां॑ धृ॒त्या अ॒प्र॒पा॒दा॒याथो॑ स॒वमे॒वैनं॑ करोति ग॒र्भो वा
ए॒ष यदु॑ख्यो योनिः शि॒क्यं य॑च्छि॒क्यादु॒खां नि॒रूहे॒द्-यो॒नेर्ग॒र्भं
नि॒र्ह॒ण्याथ॑ षडु॒द्याम॑ शि॒क्यं भ॑वति षोढा वि॒हितो॑ वै – [] 36

TS 5.6.9.1 - Padam

सू॒य॒ते । वै । ए॒षः । अ॒ग्नी॒नाम् । यः । उ॒खाया॑म् । भ्रि॒य॒ते । यत् ।
अ॒धः । सा॒दये॑त् । ग॒र्भाः । प्र॒पा॒दु॒का इति॑ प्र – पा॒दु॒काः । स्युः ।
अथो॑ इति॑ । यथा॑ । स॒वात् । प्र॒त्यव॑रोहतीति॑ प्रति – अ॒व॒रोह॑ति ।
तादृ॒क् । ए॒व । तत् । आ॒स॒न्दी । सा॒दय॑ति । ग॒र्भा॒णाम् । धृ॒त्यै ।
अ॒प्र॒पा॒दा॒येत्य॑प्र – पा॒दाय॑ । अथो॑ इति॑ । स॒वम् । ए॒व । ए॒नम् ।

क॒रो॒ति॒ । ग॒र्भः॑ । वै । ए॒षः । यत् । उ॒ख्यः॑ । यो॒निः॑ । शि॒क्य॑म् ।
यत् । शि॒क्या॑त् । उ॒खाम् । नि॒रू॒हे॒दि॒ति॑ निः – ऊ॒हे॑त् । यो॒नैः॑ ।
ग॒र्भ॑म् । नि॒रि॒ति॑ । ह॒न्या॑त् । ष॒डु॒द्याम॑मि॒ति॒ षट्-उ॒द्याम॑म् । शि॒क्य॑म् ।
भ॒व॒ति॒ । षो॒ढा॒वि॒हि॒त॑ इति॑ षो॒ढा – वि॒हि॒तः॑ । वै । 36 (50)

TS 5.6.9.2

पु॒रु॒ष आ॒त्मा च॑ शि॒रश्च॑ च॒त्वार्य॑ङ्गान्या॒त्मन्ने॒वैनं॑ बि॒भर्ति॑ प्र॒जाप॑ति॒र्वा
ए॒ष यद॒ग्नि॒स्तस्यो॒खा चो॒लू॒खलं॑ च॒ स्तनौ॑ ताव॒स्य प्र॒जा उप॑ जी॒वन्ति॑
यदु॒खां चो॒लू॒खलं॑ चो॒पद॑धाति॒ ताभ्यामे॒व यज॑मानोऽमु॒ष्मिन्
लो॒केऽग्निं॑ दु॒हे सँव॑त्सरो॒ वा ए॒ष यद॒ग्नि॒स्तस्य॑ त्रेधा॒विहि॑ता इ॒ष्टकाः॑
प्रा॒जाप॑त्या वै॒ष्णवी॑ – [] 37

TS 5.6.9.2 - Padam

पु॒रु॒षः । आ॒त्मा । च॑ । शि॒रः । च॑ । च॒त्वारि॑ । अ॒ङ्गानि॑ । आ॒त्मन् ।
ए॒व । ए॒नम् । बि॒भर्ति॑ । प्र॒जाप॑ति॒रिति॑ प्र॒जा – प॒तिः॑ । वै । ए॒षः ।
यत् । अ॒ग्निः॑ । तस्य॑ । उ॒खा । च॑ । उ॒लू॒खलम्॑ । च॑ । स्तनौ॑ । तौ ।
अस्य॑ । प्र॒जा इति॑ प्र – जाः । उपे॑ति । जी॒वन्ति॑ । यत् । उ॒खाम् ।

च । उ॒लू॒ख॒लम् । च । उ॒प॒द॒धा॒तीत्यु॒प – द॒धा॒ति । ता॒भ्याम् । ए॒व ।
यज॑मानः । अ॒मुष्मिन् । लो॒के । अ॒ग्निम् । दु॒हे । सँ॒व॒त्स॒र इति॑
सं – व॒त्स॒रः । वै । ए॒षः । यत् । अ॒ग्निः । तस्य॑ । त्रे॒धा॒वि॒हि॒ता इति॑
त्रे॒धा – वि॒हि॒ताः । इ॒ष्ट॒काः । प्रा॒जा॒प॒त्या इति॑ प्रा॒जा – प॒त्याः ।

वै॒ष्ण॒वीः । 37 (50)

TS 5.6.9.3

– वै॒श्व॒क॒र्म॒णी – र॒हो॒रा॒त्रा॒ण्ये॒वा॒स्य प्रा॒जा॒प॒त्या यदु॒ख्यं बि॒भर्ति॑ प्रा॒जा॒प॒त्या
ए॒व तदु॒प ध॒त्ते यत् स॒मि॒ध आ॒द॒धा॒ति वै॒ष्ण॒वा वै व॒न॒स्प॒त॒यो
वै॒ष्ण॒वी॒रे॒व तदु॒प ध॒त्ते यद॒ष्ट॒का॒भि॒र॒ग्निं चि॒नो॒ती॒यं वै वि॒श्व॒क॒र्मा
वै॒श्व॒क॒र्म॒णी॒रे॒व तदु॒प ध॒त्ते तस्मा॑ – दा॒हु – स्त्रि॒वृ॒द॒ग्नि॒रि॒ति तं वा॑ ए॒तं
य॒ज॒मा॒न ए॒व चि॒न्वी॒त यद॒स्या॒न्य () श्रि॒नु॒या॒द्यत् तं दक्षि॑णा॒भिर्न
रा॒धये॑द॒ग्नि॒म॒स्य वृ॒ज्जी॒त यो॒ऽस्या॒ऽग्निं चि॒नु॒या॒त् तं दक्षि॑णा॒भी
रा॒धये॑द॒ग्नि॒मे॒व तत् स्पृ॑णोति ॥ 38

TS 5.6.9.3 - Padam

वै॒श्व॒क॒र्म॒णी॒रि॒ति॒ वै॒श्व॒ – क॒र्म॒णीः॑ । अ॒हो॒रा॒त्रा॒णी॒त्य॒हः॑ – रा॒त्रा॒णि॑ ।
ए॒व । अ॒स्य॒ । प्रा॒जा॒प॒त्या॒ इति॑ प्रा॒जा – प॒त्याः॑ । यत् । उ॒ख्य॑म् ।
बि॒भर्ति॑ । प्रा॒जा॒प॒त्या॒ इति॑ प्रा॒जा-प॒त्याः॑ । ए॒व । तत् । उ॒पेति॑ । ध॒त्ते॑ ।
यत् । स॒मि॒ध॒ इति॑ सं – इ॒धः॑ । आ॒द॒धा॒ती॒त्या॑ – द॒धा॒ति॑ । वै॒ष्ण॒वाः॑ ।
वै । व॒न॒स्प॒तयः॑ । वै॒ष्ण॒वीः॑ । ए॒व । तत् । उ॒पेति॑ । ध॒त्ते॑ । यत् ।
इ॒ष्ट॒का॒भिः॑ । अ॒ग्नि॒म् । चि॒नो॒ति॑ । इ॒य॒म् । वै । वि॒श्व॒क॒र्मे॒ति॑
वि॒श्व॒ – क॒र्मा॑ । वै॒श्व॒क॒र्म॒णी॒रि॒ति॒ वै॒श्व॒ – क॒र्म॒णीः॑ । ए॒व । तत् ।
उ॒पेति॑ । ध॒त्ते॑ । तस्मा॑त् । आ॒हुः॑ । त्रि॒वृ॒दि॒ति॑ त्रि – वृ॒त् । अ॒ग्निः॑ ।
इति॑ । तम् । वै । ए॒त॒म् । य॒ज॒मा॒नः॑ । ए॒व । चि॒न्वी॒त॑ । यत् । अ॒स्य॒ ।
अ॒न्यः॑ () । चि॒नु॒या॒त् । यत् । तम् । दक्षि॑णाभिः । न । रा॒ध॒ये॑त् ।
अ॒ग्नि॒म् । अ॒स्य॒ । वृ॒ज्जी॒त॑ । यः॑ । अ॒स्य॒ । अ॒ग्नि॒म् । चि॒नु॒या॒त् ।
तम् । दक्षि॑णाभिः । रा॒ध॒ये॑त् । अ॒ग्नि॒म् । ए॒व । तत् ।
स्पृ॒णो॒ति॑ ॥ 38 (70)

(षोढाविहितो वै – वैष्णवी – रन्यो – वि॒शतिश्च॑) (A9)

TS 5.6.10.1

प्र॒जाप॑ति-र॒ग्नि-म॑चि॒नुत॑र्तुभिः सँव॒थ्स॒रं वँस॑न्तेनै॒वास्य॑
पूर्वा॑र्धम॒चिनु॑त ग्री॒ष्मेण॑ दक्षि॒णं प॒क्षं वँर्षा॑भिः पु॒च्छं श॒रदो॑त्तरं
पक्षं॑ हे॒मन्ते॑न म॒द्ध्यं ब्र॑ह्म॒णा वा अ॑स्य तत् पूर्वा॑र्धम॒चिनु॑त क्ष॒त्रेण॑
दक्षि॑णं प॒क्षं प॒शुभिः॑ पु॒च्छं वि॒शोत्तरं॑ पक्षमा॒शया॑ म॒द्ध्यं य॑ एवं
वि॒द्वान॒ग्निं चि॑नुत ऋ॒तुभिरे॒वैनं॑ चि॒नुतेऽथो॑ ए॒तदे॒व सर्व॑मव-[] 39

TS 5.6.10.1 - Padam

प्र॒जाप॑तिरिति प्र॒जा – प॒तिः । अ॒ग्निम् । अ॒चि॒नुत॑ ।
ऋ॒तुभि॒रित्यु॑तु – भिः । सँव॒थ्स॒रमि॑ति सं – व॒थ्स॒रम् । व॒स॒न्तेन॑ ।
ए॒व । अ॒स्य । पूर्वा॑र्धमि॒ति पूर्॒व – अ॒र्धम् । अ॒चि॒नुत॑ । ग्री॒ष्मेण॑ ।
दक्षि॑णम् । प॒क्षम् । वँर्षा॑भिः । पु॒च्छम् । श॒रदा॑ ।
उ॒त्तर॑मित्यु॒त् – त॒रम् । प॒क्षम् । हे॒मन्ते॑न । म॒द्ध्यम् । ब्र॑ह्म॒णा । वै ।
अ॒स्य । तत् । पूर्वा॑र्धमि॒ति पूर्॒व – अ॒र्धम् । अ॒चि॒नुत॑ । क्ष॒त्रेण॑ ।
दक्षि॑णम् । प॒क्षम् । प॒शुभि॒रिति॑ प॒शु – भिः । पु॒च्छम् । वि॒शा ।

उ॒त्तर॑मि॒त्युत् – तर॑म् । प॒क्षम् । आ॒शया॑ । म॒द्ध्यम् । यः । ए॒वम् ।
वि॒द्वान् । अ॒ग्निम् । चि॒नुते॑ । ऋ॒तुभि॒रित्यृ॑तु – भिः । ए॒व । ए॒नम् ।
चि॒नुते॑ । अथो॒ इति॑ । ए॒तत् । ए॒व । स॒र्वम् । अ॒वेति॑ । 39 (50)

TS 5.6.10.2

रु॒न्धे शृ॒ण्वन्त्ये॑नम॒ग्निं चि॑क्या॒नम॒त्यन्न॑ रो॒चत॑ इ॒यं वा॒व
प्र॒थमा॑ चि॒तिरो॑ष॒धयो॑ व॒नस्प॑तयः पु॒रीष॑म॒न्तरि॑क्षं द्वि॒तीया॑
वया॑सि पु॒रीष॑म॒सौ तृ॒तीया॑ नक्ष॒त्राणि॑ पु॒रीषं॑ य॒ज्ञश्च॑तु॒र्थी
दक्षि॑णा पु॒रीषं॑ य॒जमानः॑ पञ्च॒मी प्र॒जा पु॒रीषं॑ यत् त्रि॒चिती॑कं
चिन्वी॑त य॒ज्ञं दक्षि॑णामा॒त्मानं॑ प्र॒जाम॒न्तरि॑यात् तस्मा॒त्
पञ्च॑चितीकश्चे॒तव्य॑ ए॒तदे॒व स॒र्वं स्पृ॑णोति यत् ति॒स्रश्चि॑तय- [] 40

TS 5.6.10.2 - Padam

रु॒न्धे । शृ॒ण्वन्ति॑ । ए॒नम् । अ॒ग्निम् । चि॒क्या॒नम् । अ॒त्ति । अ॒न्नम् ।
रो॒चते॑ । इ॒यम् । वा॒व । प्र॒थमा॑ । चि॒तिः । ओ॑ष॒धयः॑ । व॒नस्प॑तयः ।
पु॒रीष॑म् । अ॒न्तरि॑क्षम् । द्वि॒तीया॑ । वया॑सि । पु॒रीष॑म् । अ॒सौ ।
तृ॒तीया॑ । नक्ष॒त्राणि॑ । पु॒रीष॑म् । य॒ज्ञः । च॒तुर्थी॑ । दक्षि॑णा । पु॒रीष॑म् ।

यज॑मानः । पञ्च॑मी । प्र॒जेति॑ प्र – जा । पुरी॑षम् । यत् ।
त्रिचि॑तीकमिति॒ त्रि – चि॒तीक॑म् । चिन्वी॑त । य॒ज्ञम् । दक्षि॑णाम् ।
आ॒त्मान॑म् । प्र॒जामि॑ति प्र – जाम् । अ॒न्तः । इ॒यात् । तस्मा॑त् ।
पञ्च॑चितीक इति॒ पञ्च – चि॒तीकः॑ । चे॒तव्यः॑ । ए॒तत् । ए॒व ।
सर्व॑म् । स्पृ॒णोति॑ । यत् । ति॒स्रः । चि॒तयः॑ । 40 (50)

TS 5.6.10.3

–स्त्रि॒वृद्ध्य॑ग्निर्यद् द्वे द्वि॒पाद्–यज॑मानः प्रति॑ष्ठित्यै पञ्च॑ चि॒तयो॑
भव॑न्ति पा॒ङ्कः पुरु॑ष आ॒त्मान॑मेव स्पृ॒णोति॑ पञ्च॑ चि॒तयो॑ भव॑न्ति
पञ्च॑भिः पुरी॑षैरभ्यू॒हति॑ द॒श सं प॑द्यन्ते द॒शाक्ष॑रो वै पुरु॑षो यावा॑नेव
पुरु॑षस्त॒ स्पृ॒णोत्य॑थो द॒शाक्ष॑रा वि॒राडन्नं॑ वि॒राड् वि॒राज्ये॑वान्नाद्ये
प्रति॑ तिष्ठति सँव॑त्सरो वै ष॒ष्ठी चि॒तिर्ऋ॒तवः॑ पुरी॑षः () षट्
चि॒तयो॑ भव॑न्ति षट् पुरी॑षाणि द्वा॒दश॑ सं प॑द्यन्ते द्वा॒दश॑ मा॒साः
सँव॑त्सरः सँव॑त्सर ए॒व प्रति॑ तिष्ठति ॥ 41

TS 5.6.10.3 - Padam

त्रि॒वृ॒दि॒ति॒ त्रि॒ – वृ॒त् । हि॒ । अ॒ग्निः॒ । यत् । द्वे॒ इति॑ । द्वि॒पा॒दि॒ति॒
द्वि॒ – पा॒त् । यज॑मानः । प्र॒ति॒ष्ठि॒त्या॒ इति॑ प्र॒ति॒ – स्थि॒त्यै॒ । पञ्च॑ ।
चि॒तयः॑ । भ॒वन्ति॑ । पा॒ङ्कः॑ । पु॒रुषः॑ । आ॒त्मा॒नम्॑ । ए॒व । स्पृ॒णो॒ति॒ ।
पञ्च॑ । चि॒तयः॑ । भ॒वन्ति॑ । पञ्च॑भि॒रिति॑ पञ्च॑ – भिः॒ । पु॒री॒षैः॑ ।
अ॒भी॒ति॒ । ऊ॒ह॒ति॒ । द॒श॒ । स॒मि॒ति॒ । प॒द्य॒न्ते॒ । द॒शाक्ष॑र इति॑
द॒श॒ – अ॒क्षरः॑ । वै । पु॒रुषः॑ । या॒वान् । ए॒व । पु॒रुषः॑ । तम् ।
स्पृ॒णो॒ति॒ । अथो॑ इति॑ । द॒शाक्ष॑रेति॑ द॒श॒ – अ॒क्षरा॑ । वि॒राडि॑ति॒
वि॒ – रा॒ट् । अ॒न्नम्॑ । वि॒राडि॑ति॒ वि॒ – रा॒ट् । वि॒राजी॑ति॒ वि॒ – रा॒जि॑ ।
ए॒व । अ॒न्नाद्य॑ इत्य॒न्न – अद्य॑ । प्र॒तीति॑ । ति॒ष्ठति॑ । सँ॒व॒थ्स॒र इति॑
सं – व॒थ्स॒रः॑ । वै । ष॒ष्ठी । चि॒तिः॑ । ऋ॒तवः॑ । पु॒री॒षम् () । ष॒ट् ।
चि॒तयः॑ । भ॒वन्ति॑ । ष॒ट् । पु॒री॒षाणि॑ । द्वा॒द॒श॒ । स॒मि॒ति॒ । प॒द्य॒न्ते॒ ।
द्वा॒द॒श॒ । मा॒साः॑ । सँ॒व॒थ्स॒र इति॑ सं – व॒थ्स॒रः॑ ।
सँ॒व॒थ्स॒र इति॑ सं – व॒थ्स॒रे॒ । ए॒व । प्र॒तीति॑ । ति॒ष्ठति॑ ॥ 41 (65)

(अव - चितयः - पुरीषं - पञ्चदश च) (A10)

TS 5.6.11.1

रो॒हि॒तो धू॒म्रो॒हि॒तः क॒र्क॒न्धु॒रो॒हि॒तस्ते प्रा॒जाप॒त्या ब॒भ्रु॒र॒रु॒णब॒भ्रुः
शु॒कब॒भ्रुस्ते रौ॒द्राः श्ये॒तः श्ये॒ताक्षः श्ये॒तग्री॒वस्ते पि॒तृदे॒वत्या॑स्ति॒स्रः
कृ॒ष्णा व॒शा वा॒रु॒ण्यस्ति॒स्रः श्वे॒ता व॒शाः सौ॒र्यो मै॒त्राबा॒र्ह॒स्पत्या
धू॒म्रल॒लामा॒स्तूप॒राः ॥ 42

TS 5.6.11.1 - Padam

रो॒हि॒तः । धू॒म्रो॒हि॒त इति॑ धू॒म्र - रो॒हि॒तः । क॒र्क॒न्धु॒रो॒हि॒त इति॑
क॒र्क॒न्धु - रो॒हि॒तः । ते । प्रा॒जाप॒त्या इति॑ प्रा॒जा - प॒त्याः ।
ब॒भ्रुः । अ॒रु॒णब॒भ्रुरि॒त्य॒रु॒ण - ब॒भ्रुः । शु॒कब॒भ्रुरि॒ति शु॒क - ब॒भ्रुः ।
ते । रौ॒द्राः । श्ये॒तः । श्ये॒ताक्ष इति॑ श्ये॒त - अ॒क्षः । श्ये॒तग्री॒व इति॑
श्ये॒त - ग्री॒वः । ते । पि॒तृदे॒वत्या इति॑ पि॒तृ - दे॒वत्याः॑ । ति॒स्रः ।
कृ॒ष्णाः । व॒शाः । वा॒रु॒ण्यः । ति॒स्रः । श्वे॒ताः । व॒शाः । सौ॒र्यः ।
मै॒त्राबा॒र्ह॒स्पत्या इति॑ मै॒त्रा - बा॒र्ह॒स्पत्याः ।
धू॒म्रल॒लामा इति॑ धू॒म्र - ल॒लामाः । तू॒प॒राः ॥ 42 (26)

(रोहि॑तः-षड्विं॑शतिः) (A11)

TS 5.6.12.1

पृ॒श्नि-स्ति॒रश्ची॑न-पृ॒श्नि॒रू॒र्ध्व-पृ॒श्नि॒स्ते मा॒रु॒ताः फ॒ल्गू॒र्लो॒हि॒तो॒र्णी
ब॒ल॒क्षी॑ ताः सा॒र॒स्व॒त्यः पृ॒षती॑ स्थू॒लपृ॒षती॑ क्षु॒द्रपृ॒षती॑ ता
वै॒श्व॒दे॒व्य॒स्ति॒स्रः॑ श्या॒मा व॒शाः पौ॒ष्णि॒य॒स्ति॒स्रो रो॒हि॒णी॒र्व॒शा मै॒त्रि॒य
ऐ॒न्द्रा॒बा॒र्ह॒स्प॒त्या अ॒रु॒ण॒ल॒ला॒मा॒स्तू॒प॒राः ॥ 43

TS 5.6.12.1 - Padam

पृ॒श्निः । ति॒रश्ची॑नपृ॒श्नि॒रिति॑ ति॒रश्ची॑न - पृ॒श्निः ।
ऊ॒र्ध्व॒पृ॒श्नि॒रित्यू॒र्ध्व - पृ॒श्निः । ते । मा॒रु॒ताः । फ॒ल्गूः ।
लो॒हि॒तो॒र्णीति॑ लो॒हित - ऊ॒र्णीः । ब॒ल॒क्षी॑ । ताः । सा॒र॒स्व॒त्यः ।
पृ॒षती॑ । स्थू॒लपृ॒षतीति॑ स्थू॒ल - पृ॒षती॑ । क्षु॒द्रपृ॒षतीति॑ क्षु॒द्र-पृ॒षती॑ ।
ताः । वै॒श्व॒दे॒व्य॒ इति॑ वै॒श्व - दे॒व्यः । ति॒स्रः । श्या॒माः । व॒शाः ।
पौ॒ष्णि॒यः । ति॒स्रः । रो॒हि॒णीः । व॒शाः । मै॒त्रि॒यः । ऐ॒न्द्रा॒बा॒र्ह॒स्प॒त्या
इ॒त्यै॒न्द्रा - बा॒र्ह॒स्प॒त्याः । अ॒रु॒ण॒ल॒ला॒मा इ॒त्य॒रु॒ण - ल॒ला॒माः ।
तू॒प॒राः ॥ 43 (26) (पृ॒श्निः - षड्विं॑शतिः) (A12)

TS 5.6.13.1

शि॒ति॒बा॒हु-र॒न्यत॑शि॒ति॒बा॒हुः स॒म॒न्त॑ शि॒ति॒बा॒हुस्त॑ ऐ॒न्द्र॒वा॒य॒वाः
शि॒ति॒र॒न्ध्रो ऽन्य॑त॒शि॒ति॒र॒न्ध्रः स॒म॒न्त॑शि॒ति॒र॒न्ध्रस्ते॑ मै॒त्रा॒व॒रु॒णाः
शु॒द्ध॒वा॒लः स॒र्वशु॑द्ध॒वा॒लो म॒णि॒वा॒लस्त॑ आ॒श्वि॒नास्ति॒स्रः शि॒ल्पा व॒शा
वै॒श्व॒दे॒व्यस्ति॒स्रः श्ये॒नीः प॒रमे॑ष्ठि॒ने सो॒मापौ॑ष्णाः

श्या॒म॒ल॒ला॒मास्तू॒पराः ॥ 44

TS 5.6.13.1 - Padam

शि॒ति॒बा॒हुरि॑ति शि॒ति - बा॒हुः ।
अ॒न्य॒त॒शि॒ति॒बा॒हुरि॑त्यन्यतः - शि॒ति॒बा॒हुः ।
स॒म॒न्त॑शि॒ति॒बा॒हुरि॑ति स॒म॒न्त - शि॒ति॒बा॒हुः । ते ।
ऐ॒न्द्र॒वा॒य॒वा इत्यै॑न्द्र - वा॒य॒वाः । शि॒ति॒र॒न्ध्र इति॑ शि॒ति - र॒न्ध्रः ।
अ॒न्य॒त॒शि॒ति॒र॒न्ध्र इत्यन्य॑तः - शि॒ति॒र॒न्ध्रः । स॒म॒न्त॑शि॒ति॒र॒न्ध्र इति॑
स॒म॒न्त - शि॒ति॒र॒न्ध्रः । ते । मै॒त्रा॒व॒रु॒णा इति॑ मै॒त्रा - व॒रु॒णाः ।
शु॒द्ध॒वा॒ल इति॑ शु॒द्ध-वा॒लः । स॒र्वशु॑द्ध॒वा॒ल इति॑ स॒र्व-शु॑द्ध॒वा॒लः ।
म॒णि॒वा॒ल इति॑ म॒णि - वा॒लः । ते । आ॒श्वि॒नाः । ति॒स्रः । शि॒ल्पाः ।

व॒शाः । वै॒श्वदे॒व्य इति॑ वै॒श्व – दे॒व्यः । ति॒स्रः । श्ये॒नीः॑ । प॒रमे॒ष्ठिने॑ ।

सो॒मापौ॒ष्णा इति॑ सो॒मा – पौ॒ष्णाः ।

श्या॒मल॒लामा॑ इति॑ श्या॒म – ल॒लामाः॑ । तू॒पराः॑ ॥ 44 (25)

(शिति॑बाहुः पञ्चविंशतिः॑) (A13)

TS 5.6.14.1

उ॒न्नत॑ ऋ॒षभो॑ वा॒मन॑स्त ऐ॒न्द्राव॑रुणाः शिति॑ककुच्छि॒तिपृ॑ष्ठः शिति॑भ॒सत्
त ऐ॒न्द्राबा॑र्हस्प॒त्याः शिति॑पाच्छि॒त्योष्ठः॑ शिति॑भ्रुस्त ऐ॒न्द्रावै॒ष्णवा॑स्ति॒स्रः
सि॒द्ध्मा व॒शा वै॒श्वक॑र्म॒ण्यस्ति॒स्रो धा॒त्रे पृ॒षोद॑रा ऐ॒न्द्रापौ॒ष्णाः
श्ये॒तल॒लामा॑स्तू॒पराः॑ ॥ 45

TS 5.6.14.1 - Padam

उ॒न्नत॑ इत्यु॒त् – न॒तः । ऋ॒षभः॑ । वा॒मनः॑ । ते । ऐ॒न्द्राव॑रुणा
इत्यै॒न्द्रा – व॒रुणाः॑ । शिति॑ककु॒दिति॑ शिति॑ – क॒कुत् । शिति॑पृ॒ष्ठ
इति॑ शिति॑ – पृ॒ष्ठः । शिति॑भ॒सदिति॑ शिति॑ – भ॒सत् । ते ।
ऐ॒न्द्राबा॑र्हस्प॒त्या इत्यै॒न्द्रा – बा॑र्हस्प॒त्याः ।
शिति॑पा॒दिति॑ शिति॑ – पा॒त् । शि॒त्योष्ठ॑ इति॑ शिति॑ – ओष्ठः॑ ।

शिति॑भ्रुरिति॑ शिति॑ – भ्रुः॑ । ते । ऐन्द्रा॑वैष्णा॒वा इत्यैन्द्रा॑ – वैष्णा॒वाः ।

तिस्रः॑ । सिद्ध्माः॑ । वशाः॑ । वैश्व॑कर्म॒ण्य इति॑ वैश्व॑-कर्म॒ण्यः ।

तिस्रः॑ । धात्रे॑ । पृषो॑दरा इति॑ पृष॑ – उदराः॑ ।

ऐन्द्रा॑पौष्णा॒ इत्यैन्द्रा॑ – पौष्णाः॑ ।

श्येत॑ललामा॒ इति॑ श्येत॑ – ललामाः॑ । तूपराः॑ ॥ 45 (25)

(उन्नतः॑ पञ्चविंशतिः॑) (A14)

TS 5.6.15.1

कर्णा॑स्त्रयो॒ यामाः॑ सौम्या॑स्त्रयः॒ श्विति॑ङ्गा अ॒ग्नये॑ यवि॑ष्ठाय॒ त्रयो॑
नकु॑लास्ति॒स्रो रोहि॑णीस्त्र्यव्य॒स्ता वसू॑नां ति॒स्रोऽरु॑णा दि॒त्यौह्य॑स्ता
रुद्रा॑णां सोमैन्द्रा॑ बभ्रु॑ललामास्तूपराः॑ ॥ 46

TS 5.6.15.1 - Padam

कर्णाः॑ । त्रयः॑ । यामाः॑ । सौम्याः॑ । त्रयः॑ । श्विति॑ङ्गाः । अ॒ग्नये॑ ।
यवि॑ष्ठाय । त्रयः॑ । नकु॑लाः । ति॒स्रः । रोहि॑णीः । त्र्यव्य॑ इति॑
त्रि – अ॒व्यः । ताः । वसू॑नाम् । ति॒स्रः । अ॒रुणाः॑ । दि॒त्यौह्यः॑ । ताः ।
रुद्रा॑णाम् । सोमैन्द्रा॑ इति॑ सोम॑ – ऐन्द्राः॑ ।

ब॒भ्रु॒ल॒लामा॑ इति॑ ब॒भ्रु – ल॒लामाः॑ । तू॒पराः॑ ॥ 46 (23)

(क॒र्णास्त्रि॒यो – वि॒श्रुतिः॑) (A15)

TS 5.6.16.1

शु॒ण्ठास्त्रि॒यो वै॒ष्णवा॑ अधी॒लो॒धक॒र्णास्त्रि॒यो वि॒ष्णव॑ उरु॒क्रमा॑य
ल॒फ्सु॒दिन॒स्त्रि॒यो वि॒ष्णव॑ उरु॒गाया॑य पञ्चा॒वीस्ति॒स्र आ॒दि॒त्यानां॑
त्रि॒व॒थ्सा-स्ति॒स्रो-ऽङ्गि॒र॒सामै॒न्द्रावै॒ष्णवा॑ गौ॒रल॒लामा॑स्तू॒पराः॑ ॥ 47

TS 5.6.16.1 - Padam

शु॒ण्ठाः । त्रि॒यः । वै॒ष्णवाः । अधी॒लो॒धक॒र्णा इत्य॑धी॒लो॒ध – क॒र्णाः॑ ।
त्रि॒यः । वि॒ष्णवे॑ । उरु॒क्रमा॑येत्यु॒रु – क्र॒माय॑ । ल॒फ्सु॒दिनः॑ । त्रि॒यः ।
वि॒ष्णवे॑ । उरु॒गाया॑येत्यु॒रु – गा॒याय॑ । पञ्चा॒वीरि॑ति पञ्च – अ॒वीः ।
ति॒स्रः । आ॒दि॒त्याना॑म् । त्रि॒व॒थ्सा इति॑ त्रि – व॒थ्साः । ति॒स्रः ।
अ॒ङ्गि॒र॒साम् । ऐ॒न्द्रावै॒ष्णवा॑ इत्यै॒न्द्रा – वै॒ष्णवाः॑ ।
गौ॒रल॒लामा॑ इति॑ गौ॒र – ल॒लामाः॑ । तू॒पराः॑ ॥ 47 (20)

(शु॒ण्ठा – वि॒श्रुतिः॑) (A16)

TS 5.6.17.1

इन्द्राय॑ राज्ञे॑ त्रयः॑ शिति॑पृष्ठा इन्द्राया॑-धि॒राजाय॑ त्रयः॑ शिति॑ककुद॒
इन्द्राय॑ स्वराज्ञे॑ त्रयः॑ शिति॑भस-दस्ति॑स्रस्तुर्यो॑ह्यः सा॒द्ध्यानां॑ तिस्रः॑
पष्ठौ॑ह्यो विश्वे॑षां दे॒वाना॑माग्नेन्द्राः॑ कृ॒ष्णल॑लामास्तूपराः॑ ॥ 48

TS 5.6.17.1 - Padam

इन्द्राय॑ । राज्ञे॑ । त्रयः॑ । शिति॑पृष्ठा इति॑ शिति॑ - पृष्ठाः॑ ।
इन्द्राय॑ । अधि॒राजायेत्यधि॑ - राजाय॑ । त्रयः॑ ।
शिति॑ककुद॒ इति॑ शिति॑ - ककुदः॑ । इन्द्राय॑ । स्वराज्ञे॑ इति॑
स्व - राज्ञे॑ । त्रयः॑ । शिति॑भसद॒ इति॑ शिति॑ - भसदः॑ । तिस्रः॑ ।
तुर्यो॑ह्यः । सा॒द्ध्यानाम्॑ । तिस्रः॑ । पष्ठौ॑ह्यः । विश्वे॑षाम् । दे॒वानाम्॑ ।
आग्नेन्द्राः॑ । कृ॒ष्णल॑लामा इति॑ कृष्ण - ललामाः॑ ।
तूपराः॑ ॥ 48 (22) (इन्द्राय॑ राज्ञे॑ - द्वाविंशतिः॑) (A17)

TS 5.6.18.1

अ॒दि॒त्यै॒ त्रयो॑ रो॒हि॒तै॒ता इ॒न्द्रा॒ण्यै॒ त्रयः॑ कृ॒ष्णै॒ताः कु॒ह्वै॑
त्रयो॑ऽरु॒णै॒तास्ति॒स्रो धे॒नवो॑ रा॒कायै॑ त्रयो॑ऽन॒ड्वा॒हः सि॒नीवा॒ल्या
आ॒ग्ना॒वैष्ण॒वा रो॒हि॒तल॒लामा॒स्तू॒पराः॑ ॥ 49

TS 5.6.18.1 - Padam

अ॒दि॒त्यै । त्रयः॑ । रो॒हि॒तै॒ता इति॑ रो॒हि॒त – ए॒ताः । इ॒न्द्रा॒ण्यै । त्रयः॑ ।
कृ॒ष्णै॒ता इति॑ कृ॒ष्ण – ए॒ताः । कु॒ह्वै॑ । त्रयः॑ । अ॒रु॒णै॒ता
इत्य॑रु॒ण – ए॒ताः । ति॒स्रः । धे॒नवः॑ । रा॒कायै॑ । त्रयः॑ । अ॒न॒ड्वा॒हः ।
सि॒नीवा॒ल्यै । आ॒ग्ना॒वैष्ण॒वा इत्या॑ग्ना – वैष्ण॒वाः । रो॒हि॒तल॒लामा॒ इति॑
रो॒हि॒त – ल॒लामाः॑ । तू॒पराः॑ ॥ 49 (18) (अ॒दि॒त्या–अ॒ष्टाद॒श) (A18)

TS 5.6.19.1

सौ॒म्यास्त्रयः॑ पि॒शं॒गाः सो॒माय॑ रा॒ज्ञे त्रयः॑ सा॒र॒ङ्गाः पा॒र्जन्या॑
न॒भो॒रूपा॒स्ति॒स्रोऽजा॑ म॒ल्हा॑ इ॒न्द्रा॒ण्यै ति॒स्रो मे॒ष्य आ॒दि॒त्या
द्या॒वापृ॒थि॒व्या मा॒लं॒गास्तू॒पराः॑ ॥ 50

TS 5.6.19.1 - Padam

सौ॒म्याः । त्रयः॑ । पि॒शङ्गाः॑ । सो॒माय॑ । रा॒ज्ञे॑ । त्रयः॑ । सा॒रङ्गाः॑ ।
पा॒र्जन्याः॑ । न॒भो॒रूपा॑ इति॑ न॒भः-रू॒पाः । ति॒स्रः । अ॒जाः ।
मल्॒हाः । इन्द्रा॑ण्यै । ति॒स्रः । मे॒ष्यः । आ॒दि॒त्याः ।
द्या॒वापृ॒थि॒व्या इति॑ द्या॒वा - पृ॒थि॒व्याः॑ । मा॒लङ्गाः॑ । तू॒पराः॑ ॥ 50 (19)

(सौ॒म्या - ए॒का॒त्रवि॒ंश॒तिः) (A19)

TS 5.6.20.1

वा॒रुणा॑स्त्रयः॑ कृ॒ष्णल॑लामा वरु॑णाय रा॒ज्ञे त्रयो॑ रोहि॑तललामा वरु॑णाय
रि॒शाद॑से त्रयो॑रु॒णल॑लामाः शि॒ल्पास्त्रयो॑ वैश्व॑दे॒वास्त्रयः॑ पृ॒श्नयः॑
सर्व॑दे॒वत्या॑ ऐन्द्रा॑सूराः श्ये॑तललामास्तू॒पराः॑ ॥ 51

TS 5.6.20.1 - Padam

वा॒रुणाः॑ । त्रयः॑ । कृ॒ष्णल॑लामा इति॑ कृ॒ष्ण - ल॒लामाः॑ । वरु॑णाय ।
रा॒ज्ञे॑ । त्रयः॑ । रोहि॑तललामा इति॑ रोहि॑त - ल॒लामाः॑ । वरु॑णाय ।
रि॒शाद॑स इति॑ रि॒श - अ॒दसे॑ । त्रयः॑ ।
अ॒रुणल॑लामा इत्य॑रुण - ल॒लामाः॑ । शि॒ल्पाः॑ । त्रयः॑ ।

वै॒श्व॒दे॒वा इति॑ वै॒श्व – दे॒वाः । त्रयः॑ । पृ॒श्नयः॑ ।

सर्व॑दे॒वत्या इति॑ सर्व – दे॒वत्याः॑ । ऐ॒न्द्रासू॒रा इत्यै॑न्द्रा – सू॒राः ।

श्ये॑तल॒लामा इति॑ श्ये॑त – ल॒लामाः॑ । तू॒पराः॑ ॥ 51 (20)

(वा॒रुणा – वि॒श्रुतिः॑) (A20)

TS 5.6.21.1

सो॒माय॑ स्व॒राज्ञे॑-ऽनो॒वाहा॑व॒नड्वाहा॑-वि॒न्द्राग्नि॑भ्या-

मो॒जोदा॑भ्यामु॒ष्टारा॑-वि॒न्द्राग्नि॑भ्यां॑ ब॒लदा॑भ्यां॑ सी॒रवा॑हाव॒वी द्वे

धे॒नू भौ॒मी दि॒ग्भ्यो वड॑बे द्वे धे॒नू भौ॒मी वै॒राजी॑ पु॒रुषी॑ द्वे धे॒नू

भौ॒मी वय॑व आ॒रोह॑णवा॒हाव॒नड्वाहा॑ वा॒रुणी॑ कृ॒ष्णे व॒शे अ॒राड्यौ॑

दि॒व्यावृ॑षभौ॑ परि॒मरौ॑ ॥ 52

TS 5.6.21.1 - Padam

सो॒माय॑ । स्व॒राज्ञे॑ इति॑ स्व – रा॒ज्ञे । अ॒नोवा॑हावि॒त्यनः॑ – वा॒हौ ।

अ॒नड्वाहा॑ । इ॒न्द्राग्नि॑भ्यामि॒तीन्द्रा॑ग्नि – भ्या॒म् ।

ओ॒जोदा॑भ्यामि॒त्योजः॑-दा॒भ्याम् । उ॒ष्टारौ॑ ।

इ॒न्द्राग्नि॑भ्यामि॒तीन्द्रा॑ग्नि-भ्या॒म् । ब॒लदा॑भ्यामि॒ति बल॑ – दा॒भ्याम् ।

सी॒र॒वा॒हा॒वि॒ति॑ सी॒र – वा॒हौ । अ॒वी इति॑ । द्वे इति॑ । धे॒नू इति॑ ।
भौ॒मी इति॑ । दि॒ग्भ्य इति॑ दिक् – भ्यः । वड॑बे इति॑ । द्वे इति॑ ।
धे॒नू इति॑ । भौ॒मी इति॑ । वै॒रा॒जी इति॑ । पु॒रु॒षी इति॑ ।
द्वे इति॑ । धे॒नू इति॑ । भौ॒मी इति॑ ।
वा॒यवे॑ । आ॒रो॒ह॒ण॒वा॒हा॒वि॒त्या॒रो॒ह॒ण – वा॒हौ । अ॒न॒ड्वा॒हौ ।
वा॒रु॒णी इति॑ । कृ॒ष्णे इति॑ । व॒शे इति॑ । अ॒रा॒ड्यौ॑ । दि॒व्यौ ।
ऋ॒षभौ॑ । प॒रि॒म॒रा॒वि॒ति॑ प॒रि – म॒रौ ॥ 52 (34)

(सो॒मा॒य॒ स्व॒रा॒ज्ञे – च॒तु॒स्त्रिं॒शत्) (A21)

TS 5.6.22.1

ए॒का॒द॒श प्रा॒तर्ग॒व्याः प॒शव॑ आ ल॒भ्यन्ते॑ छ॒गलः॑ क॒ल्मा॑षः
कि॒कि॒दी॒वि॒र्वि॒दी॒ग॒य॒स्ते त्वा॒ष्ट्राः सौ॒री॒र्न॒व श्वे॒ता व॒शा अ॒नू॒ब॒न्ध्या
भ॒व॒न्त्या॒ग्ने॒य ऐ॒न्द्रा॒ग्न आ॒श्वि॒न॒स्ते वि॒शा॒ल॒यू॒प आ ल॒भ्यन्ते॑ ॥ 53

TS 5.6.22.1 - Padam

ए॒का॒द॒श । प्रा॒तः । ग॒व्याः । प॒शवः॑ । ए॒ति । ल॒भ्य॒न्ते । छ॒गलः॑ ।
क॒ल्मा॑षः । कि॒कि॒दी॒विः । वि॒दी॒ग॒यः । ते । त्वा॒ष्ट्राः । सौ॒रीः । न॒व ।

श्वे॒ताः । व॒शाः । अ॒नू॒ब॒न्ध्या॑ इत्य॒नु – ब॒न्ध्याः॑ ॥ भ॒व॒न्ति॑ । आ॒ग्ने॒यः ।

ऐ॒न्द्रा॒ग्न इत्यै॑न्द्र – अ॒ग्नः । आ॒श्वि॒नः । ते ।

वि॒शा॒ल॒यू॒प इति॑ वि॒शा॒ल – यू॒पे । ए॒ति । ल॒भ्य॒न्ते ॥ 53 (25)

(ऐ॒का॒द॒श प्रा॒तः – पञ्च॑विं॒शतिः॑) (A22)

TS 5.6.23.1

पि॒शङ्गा॑स्त्रयो॒ वास॑न्ताः सा॒रङ्गा॑स्त्रयो॒ ग्रैष्माः॑ पृष॑न्तस्त्रयो
वा॒र्षि॒काः पृ॒श्न॒यस्त्रयः॑ शा॒रदाः॑ पृ॒श्नि॒सक्था॑स्त्रयो॒ हैम॑न्तिका

अ॒वलि॑प्तास्त्रयः॒ शै॒शि॒राः सँ॒व॒त्स॒राय॑ नि॒वक्ष॑सः ॥ 54

TS 5.6.23.1 - Padam

पि॒शङ्गाः॑ । त्रयः॑ । वा॒स॒न्ताः । सा॒रङ्गाः॑ । त्रयः॑ । ग्रैष्माः॑ । पृष॑न्तः ।
त्रयः॑ । वा॒र्षि॒काः । पृ॒श्न॒यः । त्रयः॑ । शा॒रदाः॑ । पृ॒श्नि॒सक्था॑ इति॑
पृ॒श्नि – सक्थाः॑ । त्रयः॑ । हैम॑न्तिकाः । अ॒वलि॑प्ता इत्य॒व-लि॑प्ताः ।
त्रयः॑ । शै॒शि॒राः । सँ॒व॒त्स॒रायेति॑ सं – व॒त्स॒राय॑ ।

नि॒वक्ष॑स इति॑ नि – व॒क्ष॑सः ॥ 54 (20)

(पि॒शङ्गा – विं॒शतिः॑) (A23)

Special Korvai for Anuvaakam 12 to 20

रो॒हि॒तः कृ॒ष्णा धू॒म्रल॒लामाः – पृ॒श्निः श्या॒मा अ॒रुण॒ललामाः –
शि॒तिबा॒हुः शि॒ल्पाः श्ये॒नीः श्या॒मल॒लामा – उ॒न्नतः सि॒द्ध्मा धा॒त्रे
पौ॒ष्णाः श्ये॒तल॒लामाः – क॒र्णा ब॒भ्रुल॒लामाः – शु॒ण्ठा गौ॒रल॒लामा –
इ॒न्द्राय कृ॒ष्णाल॒लामा – अ॒दित्यै रो॒हित ल॒लामः –
सौ॒म्या मा॒लङ्गा – वा॒रुणाः सू॒राः श्ये॒तल॒लामा – द॒श ।

Prasna Korvai with starting Padams of 1 to 23 Anuvaakams :-

(हि॒र॒ण्यव॒र्णा – अ॒पां ग्र॒हान् – भू॒तेष्ट॒काः – स॒जूः – सँ॒व॒त्स॒रं –
प्र॒जाप॒तिः स क्षु॒रप॒वि – र॒व॒ग्नेर्वै दी॒क्षया – सु॒व॒र्गाय॒ तं य॑न्न –
सू॒यते॑ – प्र॒जाप॒तिर् ऋ॒तुभी – रो॒हि॒तः – पृ॒श्निः – शि॒तिबा॒हु –
रु॒न्नतः – क॒र्णाः – शु॒ण्ठा – इ॒न्द्राया॑ – दि॒त्यै – सौ॒म्या – वा॒रुणाः
– सो॒मायै॑ – का॒द॒श – पि॒शङ्गा – स्त्रयो॑विं॒शतिः)

Korvai with starting Padams of 1, 11, 21 Series of Panchaatis :-

(हि॒र॒ण्यव॒र्णा – भू॒तेष्ट॒काः – छ॒न्दो॒ यत् – क॒नीया॑ञ्सन्-
त्रि॒वृद्ध्य॑ग्नि – वा॒रुणा – श्रु॒तुष्पञ्चा॑शत्)

पद पाठे (वाक्य सहित) – पञ्चमकाण्डे – षष्ठः प्रश्नः

First and Last Padam of Sixth Prasnam of 5th Kandam

(हिरण्यवर्णा – निवक्षसः)

॥ हरिः ओं ॥

॥ कृष्ण यजुर्वेदीय तैत्तिरीय संहितायां पद पाठे

पञ्चमकाण्डे षष्ठः प्रश्नः समाप्तः ॥

पद पाठे (वाक्य सहित) – पञ्चमकाण्डे – षष्ठः प्रश्नः

Details of Panchati and Padam for Kanda 5 , Prasanam 6 (TS 5.6)

	Panchati	Padams
Anuvakam 1	4	222
Anuvakam 2	6	297
Anuvakam 3	4	198
Anuvakam 4	5	232
Anuvakam 5	3	154
Anuvakam 6	4	210
Anuvakam 7	3	178
Anuvakam 8	6	307
Anuvakam 9	3	170
Anuvakam 10	3	165
Anuvakam 11	1	26
Anuvakam 12	1	26
Anuvakam 13	1	25
Anuvakam 14	1	25
Anuvakam 15	1	23
Anuvakam 16	1	20
Anuvakam 17	1	22
Anuvakam 18	1	18
Anuvakam 19	1	19

पद पाठे (वाक्य सहित) – पञ्चमकाण्डे – षष्ठः प्रश्नः

Anuvakam 20	1	20
Anuvakam 21	1	34
Anuvakam 22	1	25
Anuvakam 23	1	20
Total →	54	2436

Notes:

1. Please refer to the book “TS Kandam 1” and “TS 1.1 pada paadam with Vaakyam” for notes and conventions used in this Compilation.
2. Please download our vedic compilations from our web site www.vedavms.in